



# Wantok

**Tom Piper**  
Sosis na  
Vejtabols



Namba 2020 Me 16 - 22, 2013 28 pes

Niuspepa Bilong Yumi Ol PNG Stret!

**K1 tasol**

Teis em Win Tru!!

**3 lucky winners will WIN** A RETURN TRIP TO WATCH MANCHESTER UNITED IN SYDNEY

PRIZE INCLUDES

- 1 Game Pass
- Travel Allowance
- A return ticket
- Accommodation for 2 nights

Visit your nearest Telkom Shop now!

24/7 Customer Care Call 345 6789 or www.telkompng.com.pg

**POWER UP & STAY CONNECTED**

Reim wimpla Digicel 3G+ modem na bai yoo kisin 200MB FRI Data.

Kam insait lo stoa tude!

200MB FRI DATA

Facebook, Twitter, YouTube icons

**Digicel 3G+**

DIGICEL 3G+ MODEM

**ONLY K79**

Digicel logo

Hagen  
Haus Krai  
toktok  
long  
respektim  
meri -  
Pes 8

**STOPIM**

Yusim Meri!

Vailens egens Meri!

Kilim Meri nating long sut toktoki!

Reipm meri natingi!

Bagarapim ol pikinini!

**JK**  
kamap 60  
krismas  
- Pes 15



**Tom Piper**

Homstail  
Irish Stew

Swit moa!!





# Australia Praim Minista i gat bikpela bilip long PNG

**PRAIM MINISTA** bilong Australia, Mis Julia Gillard i bungim ol memba bilong Pot Mosbi Semba ov Komes insait long wanpela moning kaikai long Getwei Hotel Long 10 Mei 2013, na em i mekim planti bikpela toktok long ikononi na developmen bilong kantri we ol bisnis haus i gat asua long helpim.

Planti memba bilong Pot Mosbi Semba ov Komes, em ol bisnis haus, i pulapim tru olgeta temberol na dispela i mekim Siaman bilong Semba i amamas tru long soim Praim Minista long sapot bilong bisinis komyumiti long Pot Mosbi. Presiden i amamas na i tok welkam long Praim Minista Gillard na bihain i givim taim long Praim Minista i toktok.

"Praim Minista, mipela ol memba bilong Semba ov Komes i amamas long yu kam mekim planti wok tasol mi laikim yu save olsem kam bilong yu em i gutpela tru, bikos nau mipela lukim ol i stretim ol siti rot bilong mipela, olsem nay u welkam tasol long kam bek planti taim moa," Presiden i tok.

Praim Minista Gillard i tok amamas long bungim ol memba bilong Pot Mosbi Sema ov Komes na indastri long nambatu de bilong raun bilong em long Pot Mosbi taim em i bin kam las wik, long 9 i go 11 Me. Em i luksave tu long ol memba bilong Australia-



Praim Minista toktok long Geit wei hotel.

Papua Niugini Bisnis Kaunsil na Bisnis Kaunsel bilong Papua Niugini i stap long dispela moning.

"Antap long olgeta samting, mi kam long Papua Niugini long autim bel bilong mi olsem mi gat bilip long dispela nesen na gutpela

bilong em long bihain taim," Mis Gillard i tok.

Dispela em bikpela tok mi laik mekim olsem nau em taim bilong dispela nesen i kisim planti gutpela sans bilong kamapim ikononi. Na wankain toksave bai

mi givim long ol lida bilong yupela long haus palimen long taim mi bungim ol tude wantaim Praim Minista O'Neill na kabinet bilong em.

Na tomoro taim mi bungim ol lida bilong yupela long bihain taim, ol yangpela Papua Niugini long Marianville Sekenderi Skul na Univesiti bilong PNG, ol yanpela we i holim pas long dispela samting em i dia tumas long nupela kantri olsem; hop.

Em ol i tumbuna bilong independens. Long kain taim olsem we graun em i kam bung wantaim long we bilong toktok o isi komyunikesen, ol dispela yangpela lida i wok long painim wei bilong kamapim gutpela laip bilong ol yet long kainkain we na ol i lukluk long yupela long helpim.

Planti samting ol dispela yangpela lain i laikim em bai kam long yupela ol bisnis haus na wanem samting yupela save mekim olgeta dei. i kam long ol wok yupela i givim ol na ol mani yupela givim.

Tred na invesmen i givim wok na gutpela nem na hop long ol pipel. Yupela kamapim mani bilong mekim wok bilong edukesen, rot na bris na ol sevis bilong lukautim ol man nay u bringim wok kamap, invesmen na tred bilong bihain taim.

Yupela save olsem dispela kantri i no laik buruk wantaim olgeta samting em i gat, nogat, dispela kantri em i gat pinis olgeta samting. Em i gat gutpela stap bilong em long Asia Pasifik na bikpela strong bilong em i stap long ol pipel bilong yupela.

Dispela kantri i gat nem long 11-pela yia olgeta long kam antap, na i namba tri long Asia Pasifik long kamap bilong ikononi bilong em long 2011 na namba 5 kantri long kamap strong hariap long 2012. Dispela kain gutpela strongpela stori bilong kantri i no kisim gutpela luksave long wol.

Huk nambel long ol bisnis komyuniti bilong yumi i bikpela samting tru long kamapim dispela gutpela piksa na wok yupela olgeta i mekim i gat bikpela mining.

Wankain long ikononi bilong PNG i gro, ikononi poroman pasin wantaim Australia tu i gro.

Em i tok, long las 5-pela yia, 2 wei tred i kamap bikpela hariap tru na i winim 16 bilien kina. Balens bilong tred i sanap moa long sait bilong Papua Niugini i winim moa long 1 bilien dola.

insait long 5-pela yia, Australia i putim moa long 41 bilien kina invesmen long PNG em i soim olsem Australia i gat bilip long dispela nesen.

Em i tru olsem Papua Niugini i no klostu pren bilong Australia tasol nogat em i wanpela gutpela pren stret, stat long taim bilong bikpela pait we ol Papua Niugini i givim laip bilon gol long helpim Australia na long nau dispela pasin bilong poroman i go het yet.

Ating i nogat wanpela narapela

prosek i soim moa gutpela piks na promis bilong ikononi developmen i winim PNG LNG prosek we mi bai go lukim tude. LNG em i 40 bilien kina stori olsem ikononi bilong PNG na Australia i pas wantaim dispela prosek we i kamapim wok bilong ol pipel bilong yumi long, longpela taim yet i kam.

Prosek i holim promis bilong 150 bilien Amerika dola bilong PNG, long mani bai kamap long 30 yia bihain. Long ol Australia, dispela prosek i kamapim pinis, 3 bilien Amerika dola long ol kontrak ol i kisim.

Long 2011, mipela wanbel long paitim toktok bilong ikononi Wanbel Triti wantaim Papua Niugini. Dispela Triti bai mipela sainim samplea taim bihain long dispela yia nae m bai givim nupela sanap bilong mipela olsem trupela patna.

Ol Minista bilong yumi tu i gat strongpela pasin bilong toktok i go i kam wantaim ol bisnis komyuniti insait long Papua Niugini-Australia Bisnis Forum. Stat long 2012, ol opisa na ol lain i makim bisnis i save bung planti taim long strongim yet dispela wok bung wantaim.

Spesel wan em long agrimen bung long 2012 bilong stretim wok bilong visa long ol PNG sitisen i go long Australia. Namba bilong visita visa nau i go antap 25 pesen insait long wanpela yia tasol, sampela taim mipela save go moa long 10-pela dei long kliaim na mipela i stap gut yet long givim visa long intenet long PNG turis na bisnis visita long Australia.

Dispela em i bikpela samting long long developmen bilong PNG na Australia bisnis oslem PNG Onlain Visita Visa bai nau kamap tru long sampela wik i kam bihain

Mi kam long hia wantaim bikpela bilip long dispela nesen, na mi kam wantaim gutpela save tu long wanem kain hatwok na hevi yupela i pesim.

Yunaitet Nesen Milenium Developmen Gols i stap daun yet. Sosol mak bilong literesi, namba bilong mama na bebi i dai i stap antap yet na yumi i no amamas tumas. Mipela i save olsem gavman bilong yupela i gat strongpela tingting na plen long lukautim gut ikononi gro long daunim dispela kain hevi long kantri, na yupela mas save olsem Australia i gat bikpela luksave long helpim Papua Niugini Gavman na ol pipel bilong em long mekim olsem.

Gutpela tingting bilong gutpela wok i stap long Patnasip bilong Developmen we em i stap antap long patnasip wok bilong lukautim gut samting wantaim klia plen bilong kamapim gut helt, edukesen, loa na jastis, transpot na wokim ol bikpela rot na bris samting.

I gat narapela developmen wok em i klostu long lewa bilong mi em bilong givim moa pawa long ol meri long risen bilong yumi.

10 yia, 320 milien dola wok bilong Pasifik Meri Kamapim Pasifik Developmen (Women Shaping Pacific Development) mi bin lonsim long 2012 Pasifik Ailan Forum em i stap long helpim dispela. Praim Minista O'Neill i bin stap taim mi lonsim long Rarotonga, na em i givim strongpela sapot long dispela tingting.

**I go moa long pes 4...**



**NESENEL AGRIKALSAREL RISETS INSTITUT**

## SURUKIM TAIM BILONG AGRIKALSAREL INOVESENS SO

Mipela i laik toksave long olgeta ol stekholda bilong mipela, patna, fama na jeneral pablik, olsem 2013 Agrikalsa Inovesen So, we i mas kamap long Me 24, 2013, nau i suruk i go long mun Jun, 2013.

Mipela i laik tok sori long wanem ol hevi dispela senis bilong taim i givim long wok redi bilong yupela long dispela so. Mipela bai toksave long yu long de stret, taim mipela i stretim pinis. Sapos yupela i gat moa askim, plis ringim Nancy Bali ([nancy.bali@nari.org.pg](mailto:nancy.bali@nari.org.pg)), o James Laraki ([james.laraki@nari.org.pg](mailto:james.laraki@nari.org.pg)) long telepon namba 475 1444 o feks 475 1450.

**Tok Orait long dispela toksave i kam long:**

**Raghunath Ghodake, OL  
Dairekta Jeneral**



# CIS nogat control na planti kalabus man ronowe

## STANLEY NONDOL i raitim

MINISTA bilong Koreksenal Sevis Jim Simatab aste tokim palamen olsem nogat kontrol na i gat bikpela asua long koman bilong CIS wokman long ol bikpela haus kalabus long kantri na lukim planti kalabus man i ron we pinis na tok CIS opis ol korap.

Mista Simatab tok em gat bikpela wari long sefti na laip bilong pablik we ol dispela ronowe

lain bai mekim pret tasol em tok i gat bikpela hevi long CIS na tok gavman i wok at tasol ol CIS opisa nogat komand na control long wok bilong ol.

Minista Simatab tok sapos ol opisa putim was long Kapis em bai nonap long ronowe na tok ol bilong CIS ino mekim wok bilong ol.

Mista Simatab i mekim dispela toktok taim Gavana bilong Simbu Noah Kool i askim mista Simatab long tok klia long

ronowe bilong benk roba na repis Wilaim Kapis na narapela tupela wankain trabel man husat bin ronowe long Bomana haus kalabus long Tunde apinun.

Misata Simatab tok klia olsem ol CIS opis i no mekim gut wok bilong ol long lukautim ol kalabus man. Em tok moa long 100 kalabus man ronowe long dispela yia long Buimo, Beon na Bomana na ol polis i holim

pasim 9-pela tasol na kilim dai tupela.

Long mas 21 dispela yia, 44 pela kalabus lain ronowe long Beon na bihain long 3pela wik, 59 ronowe long Buimo Tunde dispela wik Kapis wantaim 2-pela ronowe long Bomana.

Mista Simatab tok CIS opis nogat control na i gat nid long gavman bai lukluk long dispela. Em tok wok sikiriti long ol haus kalabus em wik tru na ol opisa i

no mekim gut wok long putim was long biknem kriminel.

William Kapis kisim 30 yia long roberi. Em wantaim narapela tupela ronwe wantaim 3-pela pistol tasol, ripot tok wanpela dai long aste apinun.

Mista Simatab tok ol polis na CIS opisa i wok long painim dispela lain yet na bai ol toksave long pablik taim CIS i pinism ripot long dispela ronowe bilong Kapis na narapela tupela.

## Noken singaut long ansa, yu mas kamapim ansa

### Fr. Giorgio Licini PIME i raitim

**OL LIDA meri na ol save meri bilong Madang, i laikim strongpela mekim save long ol trabel man, tasol ol i no laik singautim loa bilong kilim man olsem mekim save bilong ol long brukim loa.**

Ol meri long Madang, i laikim bai ol i luksave moa long as tru bilong pait na hevi i kamap long komyuniti. Dispela tingting em ol i bin kamapim insait long wapela bikpela kibung ol i holim long Divine Word Yunesiviti. Het tok bilong dispela kibung em, "Noken singaut long ansa, yu mas kamapim ansa."

Ol meri i bin holim dispela kibung bilong rere long bikpela nesanel haus kraik we i stat long Tunde 15, i go pinis long Trinde 16 Me long Mosbi, NCD, em long tingim na luksave long ol meri husat i kisim bikpela bagarap o i dai long pasin pait na ol i laik askim gavman long mekim samting.

Insait long kibung, bikpela toktok i kamap long famili i bruk na i kamap olsem wanpela bikpela as bilong ol hevi we i wok long bagarapim kantri nau. Ol pikinini i kamap long famili i bruk, i nogat gutpela lukaut, na skul em i kamapim gutpela graun bilong pasin bikhet na brukim loa long laip bilong ol.

Narapela hevi em long

pasin bilong lusim ples kanaka na i go long ol taun na siti tasol i no kisim gutpela wok na ol i go sindaun long ol setelmen. Hevi long famili i kamap, em i soim dispela bikpela hevi bilong Papua Niugini sosaiti i wok long senisim pasin bilong tumbuna we ol ples kanaka i save stap blong ol yet, wantaim wanwan ol tumbuna pasin na loa bilong ol yet, na nau ol i laik kamap stap long nupela pasin na kastom bilong nupela taim, we i save stap long strong bilong kes mani, na long raun i go i kam nabaut na isi toktok i go i kam long telepon, redio, internet na tv samting.

Ol i tok moa long pasin bilong i no skelim gut samting we i kam insait long sosaiti bikos ol man i kisim kainkain pei na mani mak, olsem sampela i kisim bikpela mani long wok o bisnis bilong ol, na sampela i no kisim bikpela mani inap long lukautim olgeta famili bilong ol.

Ol i luksave tu long komyunikesen long wei bilong internet i kamapim pasin bilong lukim piksa nogut, na i kamapim dispela sik nogut bilong repim o bagarapim ol meri, na tru olsem sampela man husat i mekim dispela, ol i mas dai, tasol nau ol i stap aninit long brukim loa bilong kilim man tasol olsem na ol i no kisim mekim save bilong kilim i dai.

# 12

## SAMSUNG GALAXY S3'S UP FOR GRABS!

# Bank Smart

with BSP Mobile Banking and you could own a Samsung Galaxy S3.

BSP is giving away 1 Samsung Galaxy S3 Plus 10 Nokia Ashas per week for 12 weeks.\*

**To qualify:**

1. Simply register for Mobile Banking
2. Perform an eligible transaction Via BSP Mobile Banking.

- ✓ Fund Transfer
- ✓ Third Party Fund Transfers
- ✓ Purchase EasiPAY or
- ✓ Digicel Credits

Faster, Cheaper, Anywhere, Anytime 24/7

\*Refer to our website for full Terms and Conditions | Promotion Valid 15th May - 31st July

320 1212 / 7030 1212 - 24/7

servicebsp@bsp.com.pg

www.bsp.com.pg

Like us on:

Official Sponsor of the 2015 Pacific Games

# TELE Apdeit

## Konektim skul bilong yu long intanet

Yu ken yusim ADSL o long ol telepon lain, o long waiales (WiMAX) wantaim ol Telikom Skul Pokes plen:

### PostPaid Pokes

Telinet Skul 1,000MB

Telinet Skul 2,000MB

Telinet Skul 3,000MB

Telinet Skul 4,000MB

### Fri Daunlod

1GB, 2GB, 3GB, 4GB

### Rent long olgeta Mun

K50, K80, K113, K150

### Ekses Sas long wan wan MB

0.11, 0.11, 0.11, 0.11

● Namba wan luksave bai go long ol skul i no konek yet long intanet.

● FRI Instolesen

● Karamapim olgeta bikpela siti na eria Telikom i gat siknel

Ol askim: Email [sales@telinet.com.pg](mailto:sales@telinet.com.pg) o Telepon 3025500 o 3025554

### Winim raun i go lukim Manchester United

Kamap wanpela long tripela laki wina long winim wanpela riton trip i go long lukim Manchester United i salensim A – League All Stars long ANZ Stadium long Sydney dispel mun Jul.

### Prais em:

- Wanpela Gem Pas o tiket
- Wanpela balus tiket
- Tupela nait silip
- Travel Alawens

### We bilong Winim

Spendim K200 o moa long wanem ol Telikom Prodak long wanem ol Telikom Stua, raitim nem na address bilong yu long baksait bilong risit, dropim insait long bokis, long wanem ol Telikom Stua, na go insait long droa long win.

### 19t/MB

Hamamas wantaim Prepaid 19 toea of-pik intanet ret namel long 7am-7pm. I nogat hevi long en.

Long save moa, ringim 24/7 Kastoma Kea long 3456789.



Call 147  
Customer Care on 345 6789

# Woks dipatmen stretim ol rot wantaim K1bilian

## STANLEY NONDOL i raitim

**WOKS dipatmen nau wok long go het long stretim ol rot insait long kantri wantaim K1 bilian tasol dispela mani em nonap long fiksion olgeta rot bilong wanem dipatmen nogat inap masin, na menpawa na manil long stretim olgeta rot insait long kantri.**

Minista bilong woks Francis Awesa aste long palamen taim tokim ministrial stetmen bilong em tok klia olsem woks dipatmen stil igat nid moa long K1 bilian long stretim ol rot na O'Neill /Dion gavman tokaut long K1 bilian long 2013 baset we nau dipatment i mekim wok stap tasol dispela mani em nonap na ol bikpela haiwe na ol liklik long long planti hap long kantri stap pinis long bikpela bagrap. Dipatmen bilong woks tu nogat inap

enjinnias na ol bikpela masin na ol samting bilong stretim rot.

Bihian long Minista Awesa meki toktok bilong em i lukim tok pait kamap namel long oposisen na tu namel bens memba we ol tok ol rot insait long kantri I bagarap olgeta na mekim laip bilong ol pipel go hat tru maski olgeta yia gavman tokaut long bikpela million kina long fiksion ol rot.

Mista Awesa tok woks dipatmen ino gat ol inap ol enjinia bilong bildim bris na rot long woks dipatmen long mekim rot na bris aninit long program bilong gavman. Em tok ol enjinia em ol ronowe go wok long PNG LNG projek we gat gutpela pei na dispela i mekim hat tru long woks dipatmen. Minista Awesa tu tok Pablik Trensport Bot o PTB bilong Woks dipatmen i no moa wok na dispela tu mekim hat long stretim

olgeta rot insait long kantri. PTB save lukautim olgeta bikpela masin na save gat inap wokman long sekim ol rot na stretim bagrap tasol long planti yia PTB I no moa wok na ol bikpela haiwe na tu ol liklik rot I stap long bikpela bagarap.

Minista Awesa tok bikpela lukluk bilong woks dipatmen nau aninit long woks dipatmen wantaim K1bilian bai,

- stretim ol bikpela haiwe long na taun na provinsel rot;

- opim 4-pela bikpela rot long kantri long joinim Erave –SHP na Sembirinki long Galp provins, joinim Kaintiba na Asek rot long Morobe na Galp na joinim Ist na Wes Nu Briten na pinisim Baiyer-Madang rot;

-Gavman bai stretim PTB seksen bilong woks dipatmen wantaim masin, na inap samting

long mekim mentenens o stretim bagrap rot long rurel ples na distrik na

-bai kamapim Infrastraksa Divelopmen Atoriti long arere bi long dispela yia long go pas long olgeta rot na bris long kantri.

Memba bilong Chuave Wera Mori I sapotim toktok bilong Mista Awesa na tok gavman mas kwiktaim stretim PTB. Mista Mori tok ol rot long hailans Haiwe i bagarap pinis na gavman gat bikpela nid long stretim hariap. Mista Mori tok dispela haiwe em givim bikpela sevis long LNG projek na tu Porgera gol main long Enga provins. Em tok Simbu seksen i bagarap na ol papa-graun tu lusim planti graun na propeti long graun bruk na tok gavman mas lukluk long stretim kwik long ol pipel ken kisim sevis.

# Gavaman bai apim pe bilong vilis kot mejistret na pis opisa

## STANLEY NONDOL i raitim.

MINISTA bilong Jastis na Atoni Jenerel, Kerenga Kua, aste tokim palamen olsem dipatmen bilong em nau wok long stretim pepa long kisim tok orait long gavman long apim pe bilong ol vilis kot mejistret, pis opisa na tu ol kansol long ples.

Mista Kua husat tu em memba bilong Sinasina Yon-gomul long Simbu provins tok ol dispela lain trutru ol save mekim hat wok long ples long halivim daunim hevi bilong loa na oda tasol ol i no kisim inap pe long planti yia na tok gavman long bipo I asua i no lukluk long dispela sait.

Mista Kua i mekim dispela toktok bihain long gavna bilong Milen Be, Titus Philemon i askim Mista Kua na tok bilong wanem as tru na

ol vilis kot mejistret na pis opisa i no save kisim inap pe pay long lukautim ol yet na askim sapos gavman i gat plen long apim pei, bilong wanem ol save mekim bikpela hat wok stret long ples.

Mista Kua tok aninit long loa bilong kantri nau ol dispela lain no save kisim pe long mak we Minimum we Bot i putim. Mista kua tok moa olsem gavman long planti yia tru i stilim leba bilong ol dispela hat wok lain aninit long loa na em tok dipatmen bilong em nau i stretim pepa long senisim loa we nogat gutpela luksave long hatwok bilong ol long apim pe bilong ol go antap.

Minista Kua tok aninit long nupela loa wanwan vilis kot mejistret na pis opisa bai kisim K150 long potnait. Em tok em tu bai lukluk long

apim pe bilong ol wod kansol.

Nau em ol vilis kot mejistret siamen save kisim K32 long wanwan mun na deputi save kisim K29 na ol nejistret natin save kisim K26 long wanwan mun na kot klak kisim K24.

Mista Kua tok gavman i asus tru long lukluk long dispela hevi long planti yia. Mista Kua tok moa olsem sapos pe bilong ol go antap bai lukim hevi bilong loa na oda long komuniti bai go daun. Mista Kua tok em putim K800, 000 bilong DSIP mani long 2013 long pei bilong vilis kot mejistret na pis opisa long K150 potnait na ol wok strong moa na daunim hevi bilong stim na spak brus long Kundiawa na Sinesine. Em tok ol dispela lain save wok hat na tok em bai mekim kamap loa long givim gutpela pei long ol.

## Australia Praim Minista i gat bikpela bilip long PNG

### I kam long pes 2...

Mi laik tenkim ol bisnis haus hia husat i wok hat long givim ples long ol meri kisim wok long PNG.

Westpac 'Meri Bisnis Awot' i helpim long lip-timapim nem bilong ol meri long bisnis. Ol kampani olsem SP Brewer i bin strong long kisim ol meri long wok taim ol i greduet long skul.

Nesanel Katering Sevis i kamapim polisi long luksave long ol wok meri wankain olsem ol man long wok ples bilong ol. Long sapotim ol bisnis long bihainim dispela pasin, mi amamas long tokaut long nupela patnasip wantaim intanesanel Fainens Korporensen (IFC) bai helpim PNG kampani long strongim ol meri long kisim ples bilong ol insait long wok ples.

Mia mamas long lukim Lady Winifred Kamit, wanpela bikmeri na lida meri long nesen i wanbel long kamap mama bilong dispela wok bilong iFC. Lady Winifred, mi amamas tru olsem yu stap hia tude wantaim sampela, arapela meri na mi laik long bungim yupela bihain liklik long dispela moning. Mi laikim yu save olsem mi gat bikpela rispek na luksave long olgeta wok bilong yu na tenkyu long sapot bilong yu.

Mipela bai lukluk moa long tupelo eria, namba wan em long lukautim meri na long wok bilong stopim pasin bilong paitim na bagarapim meri insait long ples bilong wok.

Nambatu em long lainim na wok bung wantaim long bringim ol meri i gat bikpela save long ol ples bilong lidasip.

I nogat wanpela nesen bai kamap strong sapos ol i no lukautim gut wok kamap bilong olgeta sitisen bilong ol na long yusim olgeta save bilong ol pipel bilong ol.

Papua Niugini i kam long pela rot pinis i nap 40 yia. Planti salens bilong bipo em i winim pinis. iekonomik developmen i bringim nupela sans long gutpela sindaun. Nau ol pipel i lukim olsem gutpela sindaun bai kamap klostu taim.

Australia i laik wok wantaim Papua Niugini olsem iekonomik patna, olsem developmen patna na patna long risen long helpim yu long holim pas laip bilong yu long bihain taim.

Olgeta lain nau i stap long hia, i gat bikpela wok long kamapim dispela driman i kamap tru.

Yumi mekim bisnis wantaim olsem ol gutpela fren na rispek bai i stap. Yumi mas gat bikpela amamas long wanem samting yumi kampim wantaim pinis na save olsem i gat gutpela taim bai i kam yet.

# AGRICULTURE TRACTORS

- Slashers
- Disc Ploughs
- Disc Harrows
- Post Hole Augers
- And Other Attachments for Farming

90hp

70hp

50hp

AGMARK MACHINERY

PORT MORESBY: 323 5572 | LAE: 472 6324 | KOKOPO: 962 8748  
[machinery@agmark.com.pg](mailto:machinery@agmark.com.pg)



# Strongim wok polis ken kamap klostu taim

**NUPELA wok bung** namel long PNG na Kwinslen gavman bilong Australia, i ken lukim wok bilong strongim polis trening namel long tupela kantri i kamap pastaim long ol arapela bikpela wokbung namel long tupela kantri.

Praim Minista Peter O'Neill i bin sainim wanpela tok wanbel wantaim Kwinslen Premia Campbell Newman, we bai lukim senisim bilong ol polis opisa bilong Kwinslen i kam long Mosbi, na ol polismanmeri bilong PNG igo kisim trening long Kwinslen.

150 Kwinslen polis opisa bai kam long PNG, na

wankain namba bai go long Kwinslen.

Ol sinia opisal bilong PNG na Kwinslen bai bung long ol wik i kam long stretim olgeta liklik toktok bilong dispela wokbung.

"Lo na oda em i wanpela long ol bikpela eria, na mi amamas olsem gavman bilong yu i bekim kwik askim bilong mipela," Mista O'Neill i tokim Mista Newman.

Aninit long agrimen, PNG Gavman bai painim halivim na save bilong Kwinslen gavman long bildim wanpela haus sik bilong Daru insait long Westen Provins.

Dispela bai stretim ol wari i stap nau long sait bi-

long helt namel long Daru na Tores Straits, we ol asples i save kalapim boda long painim tritmen bilong ol kain sik olsem sik TB, insait long ol haus sik long Kwinslen.

"Mipela i gat ol bikpela hap mani i sindaun insait long ol tras akaun i stap ovasis, na dispela i ken go long ol helt sevis long Westen provins. Save yupela i gat i ken halivim mipela long disainim wanpela haus sik we i ken inapim olgeta nid bilong mipela," Mista O'Neill i tok.

Long wankain taim, ol enjinia bilong Kwinslen bai kam long PNG long halivim na disainim ol rot long kantri.

Olgeta dispela wok bung i bihainim lukluk raun bilong Australia Praim Minista Julia Gillard las wik.



**WOK GO HET:** Nupele agrimen wantaim Kwinslen gavman long Australia i ken lukim ol wok bilong senisim ol polismanmeri long tupela kantri i go het klostu taim.

## Planti giaman taitol na paul pasin long lens Dipatmen

Stanley Nondol i raitim

SEKRETERI bilong dipatmen bilong Lens Romily Kila-Pat, tokaut olsem bikpela paul pasin stap yet long Lends dipatmen na lukim planti kon lain i wok long karim giaman taitol bilong grauni we ol kisim long paul rot na dipatmen nau bai givim spesel taitol pepa long ol trutru ona bilong graun na haus.


Mista Kila-Pat tok moa olsem dipatmen nogat gutpela rikot o sistem bilong lukautim gut ol fail. Em tok ol fail em stap nating long pepa long opis na i no long komputa, na dispela i opim dua bilong ol wokman insait long dipatmen i wok long paulim na mekim planti pasin korapsen.

Mista Kila-Pat tok dipatmen bilong em nau wok hat tru long daunim ol dispela pasin nogut. Em tok ol i kamapim pinis wanpela bodi long go pas na bai putim olgeta fails go insait long komputa long banisim ol kon wokman insait long dipatmen long noken gat sans long paulim pepa na ol taitol.

Mr. Kila-Pat tu tok nau ol bai senisim lukluk bilong taitol pepa. Ol taitol pepa bai gat wanpela spesol mak we Lends dipatmen bai putim long trutru taitol na dispela em bai mekim hat long ol kon man long holim giaman taitol.

Las wik taim Pablik Akauns Komiti i harim inkwari go insait long ol paul pasin bilong sampela gavman dipatmen i lukim Mista Kila-Pat tu mekim dispela tokotk long PAC membas olsem trutru lends dipatmen i korap.

Deputi Sekretari bilong PAC, Benjamin Poponawa, i gat bikpela wari tru olsem planti paul pasin i wok long kamap long lens dipatmen na em i hat tru long Lends dipatmen stretim dispela kwiktaim na lukim planti kot keis i wok long kamap long ol propeti na haus. Mista Poponawa tok graun em bikpela samting long Papua Niugini, na em i askim Mista Kilapat sapos em tru olsem ol sampela konman i karim giaman taitol raun na salim long narapela long wankain propeti we ol trutru ona i gat tru taitol.



**Yumi Stori long PNG LNG**  
with Peter Graham, Managing Director, Esso Highlands Limited

Olgeta lain i save olsem mipela i spendim planti bilien Kina pinis long konstraksen wok bilong Projek long dispela tripela yia. Tasol planti lain i no save long bikpela kontribusen Projek i givim tu long trening bilong ol Papua Niugini pipel. Mipela i luksave olsem nesanel konten na komyuniti invesen em i bikpela samting - bikos, dispela em ol eria we bai helpim ol lokal komyuniti wantaim sastenebel, long-tem benefit na tu, bai helpim long strongim laisens bilong mipela long operet long ol dispela komyuniti.

Planti taim ol lain i no klia long ol Projek plen na agrimen wantaim ol gavman. Ol Projek plen na agrimen i stap long website bilong mipela [www.pnglng.com](http://www.pnglng.com) na i karamapim tu Nesanel Konten Plen bilong mipela na Envairemental na Sosel Manesmen Plen. Long Nesanel na ol Provinsal gavman, i gat Ambrela Sering Agrimen na Laisens Besd Benefits Sering Agrimen we i tok klia long ol risponsibiliti bilong gavman na ol lenona.

Wanpela Projek komitmen bilong mipela em long givim wok na developim save bilong ol sitisen bilong Papua Niugini. Mipela i givim wok na trening i go long moa long 9,000 pipel bilong Papua Niugini long kirapim Projek na redi long ol operesen bai kamap bihain. Mipela i spendim moa long 170 milien Kina long sanapim ol trening fesiliti long Pot Mosbi na Juni na tupela wantaim, i givim moa long 1.7 milien aua long trening. Mipela i givim wok long 140 yangpela Papua Niugini pipel aninit long Operesens na Mentenens trening program we ol i go stadi long Canada na Malaysia, givim wok long 12-pela greduet ensinia we wan wan bilong ol i pinisim 18 mun trening long Australia. Mipela i amamas long ol sans em Projek i givim long bikpela namba bilong ol Papua Niugini pipel na mipela i amamas tu long lukim ol i yusim gut dispela sans ol i bin kisim.

Mipela i mekim bikpela kontribusen long wokim ol rot na bris na ol arapela infrastraksa bikos mipela tu i yusim ol

dispela samting. Mipela i investim moa long 320 milien Kina long apgredim ol rot na mekim wok mentenens long Hailans Haiwe, givim 15 pri-febriketet bris long sanapim aninit long program bilong gavman long senisim ol bris, na givim 4.3 milien Kina long wokim stadi long developim 20 yia plen bilong progresiv apgred bilong Hailans Haiwe. Dispela em i wanpela hap, na mipela i givim tu mani bilong skruim ol wok i go moa yet long Hailans Haiwe, 23 milien Kina invesen bilong mipela long apgredim Tari ples balus na 2 milien Kina mipela i spendim long disainim Komo, Nogoli na Hides taun.

Mipela i mekim ol arapela wok tu long komyuniti level. Olgeta taim, mipela i mekim ol wok wantaim ol han bilong gavman, non-gavman ogenaisesen na pralvet sekta long kamapim ol komyuniti sapot program. Mipela i makim pinis 1.2 milien Kina invesen long apgredim faivpela skul long Hela Provins, 3 milien Kina invesen long sanapim ol komyuniti senta na rekriesen eria long ol ples olsem Homa, Tubage, Ailio na Baguale na 270,000 Kina invesen long sanapim wanpela bikpela miting haus long Porebada. Wantaim mani sapot, mipela i helpim ol meri long Lealea long sanapim pis maket na kamapim sans bilong wokim bisnis, givim pesonel vaibiliti trening long 1,000 pipel, givim trening long ol meri long eria bilong fainensel literesi, helt bilong ol meri na nutrisen na sapatim 17-pela meri long go long Global Women in Management program we i karamapim trening kos long Washington DC na Jakarta.

Bungim olgeta wantaim, mipela i spendim pinis moa long 8200 milien Kina long Papua Niugini na 1700 milien Kina long ol lenona kampani. Dispela mak bilong mani i wok long surik i go antap, wantaim save bilong ol Papua Niugini bisnis manmeri bikos long dispela Enterprise Centre mipela i kamapim, we i helpim pinis moa long 15,000 pipel. Mipela i givim bek helpim i go long ol komyuniti we mipela i wok long en na long ol narapela hap tu, bipo long namba wan molekul bilong LNG i kamap na bipo long mipela i kisim wanpela toea. Na mipela i amamas long stap insait long developim Papua Niugini.

Mi gat laik long harim long yupela, na wanem samting yu laik ritim long dispela kolum. Bai mipela tra'im long bekim olgeta askim bilong yupela, olsem na plis salim email i kam long mipela long [pnglngproject@exxonmobil.com](mailto:pnglngproject@exxonmobil.com)

Gutpela de.

## BEYOND BOUNDARIES SUNDAY, 6PM - 6.30PM

Topic of the week:

**Chikungunya Viral Mosquito Disease in Papua New Guinea**



**FM100**  
PNG's Information & Music Leader

Text 1610

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAU 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMAMAL 100.6	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8



# Nogat gutpela samting bai kamap sapos ol i kilim man bilong brukim loa

Het bilong EU Deligesen long Papua Niugini, His Ekselensi, Martin Dihm i tok kilim man long mekim save long ol i brukim loa, bai i no inap long kamapim wanpela gutpela samting long kantri. Hia yumi ritim toktok bilong Mista Martin Dihm long tingting bilong Yuropien Yunien (EU).

"I luk olsem ol pasin bilong brukim loa insait long Papua Niugini i kamap bikpela tru olsem na planti bikpela toktok i wok long kamap long dispela taim bilong stretim dispela hevi. Moa toktok i kamap long ol pasin nogut bilong bagarapim na kilim nating meri, we i bin kamap long ol meri long, na long tokwin bilong sanguma. Gavman i mekim wok pinis na autim wanem kain rot em bai kisim long daunim pasin bilong brukim loa. Yuropien Unien (EU) i gat bikpela laik long bihainim dispela tok pait," Mista Dihm i tok.

Planti lain i lukim olsem dispela Loa bilong pasin

sanguma i luk olsem em i kamapim planti giman long ol lain, long kamapim bikpela pasin bikhet, na em bai gutpela tingting stret, sapos Palimen i rausim. Long wankain taim tu, planti lain i amamas long gavman i putim moa mekim save long ol bikpela pasin bikhet olsem pasin bagarapim na kilim meri.

Tasol EU i tingting planti long ol toktok bilong bringim bek pasin bilong kilim trabel man olsem mekim save bilong ol long brukim loa. Laspela taim dispela kain mekim save i bin kamap long Papua Niugini, em bipo tru long 1954. Tasol taim Papua Niugini kisim indipendens, i nogat moa trabel man i dai long trabel ol i mekim.

Toktok bilong yumi laikim, o i no long laikim kilim dai trabel man olsem mekim save long kamap insait long Papua Niugini i mekim mipela long tingim bek long bipo, bipo taim long Yurop. Trupela tok em olsem, ol kantri long Yurop i bin namba wan lain long katim

nek olsem pasin mekim save bipo tru taim ol pipel i bin stap aninit long pawa bilong ol strongpela gavman, tasol nau Yurop em i wanpela risen long wol, we i no save kilim man olsem mekim save long pasin bilong brukim loa.

Em i wanpela bikpela asenda bilong Yuropien Yunien long kempein na rausim olgeta pasin bilong kilim man taim ol i mekim bikpela rong long sosaiti. Na EU i tok olsem olgeta kantri husat i laik kamap memba bilong Yunien, i mas rausim loa bilong kilim man olsem mekim save long brukim loa. Na EU i kamapim wanpela pasin bilong i noken wanbel wantaim pasin bilong kilim man long olgeta ples ol i stap na wok long en.

Na Yurop i no wanpela tasol wantaim kain tingting bilong noken kilim man olsem we bilong mekim save. Olgeta hap long graun em ol kantri i wok long bihainim wankain pasin. Hia long Pasifik em i gat tupela kantri tasol i holim yet loa bilong kilim man olsem mekim



EU Het of Deligesen, His Excellency Martin Dihm. Foto: EU PNG opis

save, insait long ol loa buk bilong ol na insait long tupela kantri wantaim i nogat wanpela kalabus man i kisim dispela mekim save yet i nap long planti yia moa.

Taim ol kantri bilong wol i bihainim pasin bilong rausim loa bilong kilim man, i gat sampela gutpela astingting long dispela. Ol i lukim olsem kilim man long bekim pasin nogut bilong ol em i wanpela haiden na kanaka pasin stret bilong bipo taim.

I gat planti moa kantri long wol i bilip olsem sapos ol i rausim loa bilong kilim man, em bai strongim moa we bilong rispektim ol man na moa wok kamap long rait bilong ol man, meri na piknini.

Ol lotu grup (Faith based organisations) i lukim tu loa bilong kilim man olsem mekim save bilong ol brukim loa, olsem em i brukim ol bikpela loa bilong God. Na i gat sampela moa teknikal astingting i stap.

"Taim man i dai bai yu no nap kisim bek. Maski bikpela jas o kot long wol i ken karangi long disisen bilong ol. Taim wanpela jas o kot i tokaut long disisen bilong kot, nogat wanpela pawa long wol i ken senisim gen dispela, sapos nupela toktok gen i kamap olsem dispela man i no mekim rong. i gat piksa bilong dispela wantaim ol arapela kantri long dispela, taim ol i yusim pasin bilong sekim blut bilong save tru olsem man i mekim rong o nogat, na ol i lukim olsem man husat i kisim taim em i no bin mekim dispela rong. Tasol em i tu let long kisim bek man taim em i stap pinis long rot bilong dai," Mista Dihm i tok moa.

Wanpela saveman bilong France, long bipo taim bilong yia 1800, Voltaire i tok tasol olsem: "Moa beta long yumi holim laip bilong wanpela man i mekim rong, na i no gutpela long yumi mekim save nating long wanpela man i no mekim rong."

Antap long dispela, olgeta wok painimaut i stap nau long graun i soim olsem pasin bilong kilim man i brukim loa i no save stopim pasin bilong brukim loa. Kainkain stadi i kamap pinis tasol ol i no save luksave yet olsem loa bilong kilim man, inap stopim man long mekim rong, na em i wankain tasol olsem ol i givim bikpela taim long man i go kalabus longpela taim.

Yumi olgeta i save long tingting bilong man bilong graun olsem, man i kilim man, i mas dai tu. Tasol olsem wanem? Stet o kantri bai i no nap long kirap na daunim belhat bilong man na winim pait bilong brukim pawa bilong kain ol bikpela pasin nogut i daunim sosaiti long gutpela wei?

Nogat gutpela samting i kamap long kilim man bilong brukim loa. Tasol sapos kilim man i no wanpela isi wei bilong stretim hevi, wanem moa rot i stap long stopim pasin bikhet na brukim loa?

Planti lain husat i lukluk long dispela hevi i ting olsem ol i mas putim moa mani i go insait long polis fos long ol bikpela taun na siti na tu long ol rural eria, long strongim loa na oda. Em bai stretim hevi long sotpela taim long pait na daunim pasin brukim loa insait long komyuniti, na mekim ples i moa seif long ol pablik. Tasol sapos yumi lukim long sampela taim bihain, em yumi lukim i gat planti astingting istap. Em bai luk olsem i no luk smat o bikpela samting tumas, tasol i gat bikpela promis bilong longpela taim istap.

Gutpela wok bilong gavman long strongim edukesen, helt, na kamapim moa wok bai givim strong long ikonomi bilong kantri na kamapim gutpela sindaun long Papua Niugini. Antap long dispela, ol i ken lukim olsem dispela em i gutpela wei long senisim pasin bilong brukim loa long sotpela taim na longpela taim tu.

"Ol yanpela man, meri bai wok hat long gutpela wok mani, na bai i nap long lukautim famili i stap gut na bai i nogat tingting long stil long ol man o stilim ka," em i tok moa.

Em i tok, insait long Yurop, save bilong stopim pait em i save stat long skul. Lainim wanpela sitisen bilong tomoro long wei bilong stretim hevi wantaim bel isi, na wei bilong rispektim narapela wantok, moa yet ol meri, em i bikpela samting long kamapim nesen na bringim bel isi na gutpela sindaun.

Ol bikpela stori yumi lukim na harim long ol taim i go pinis insait long kantri na ausait, nius i soim klia olsem em kantri i kisim nem nogut na planti moa gutpela lain sitisen husat i save laik mekim fren wantaim ol arapela lain na bihainim loa bilong kantri.

"Mi gat strongpela tingting olsem Papua Niugini bai kamap strong moa bihain long dispela toktok bilong kilim man long ol i brukim loa.

"Yuropien Yunien insait long PNG, bai sapatim yet Papua Niugini gavman, long traim long painim ol rot bilong kamapim pasin bel isi, bilong stap longpela taim, olgeta lain i mas lukim developmen long wei bilong tred agrimen na kamapim planti wok insait long kantri, long strongim invesmen, o wantaim helpim bilong mipela long skul, we i gat skul bilong daunim pasin bilong pait na bagarapim narapela lain," Mista Martin Dihm i tok.

For More Information on Telikom Products & Topup Call Your Nearest Outlet

• Aitsea	• 841 1388	• Madang	• 482 2032
• Goroka	• 332 2153	• Milneburg	• 042 2420
• Koroia	• 831 3003	• PNG Bayulu	• 329 4692
• Koroia	• 894 2022	• POM Vunilo	• 333 0242
• Koroia	• 805 9098	• Pukania	• 629 1241
• Kokopo	• 802 9338	• Suluan Ramata	• 402 8444 / 8012
• Kuching	• 336 1362	• Wewak	• 487 3125
• Lae	• 872 9011 / 2012	• Wewak	• 488 2886

TELIKOM PNG  
A Country's Network

24/7 Customer Care Call 345 6789 or www.telikompng.com.pg



# Oi Poto bilong Praim Minista bilong Australia, Julia Gillard raun hia long PNG...



## NASFUND FM100 TALKBACK SHOW

MONDAY - FRIDAY, 9AM TO 12PM

Participate and be heard on an open forum on National Radio



# FM100

PNC's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KJUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCU 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8



# Hagen Haus Krai toktok long rispektim meri...



**L**ONG aste, ol pipel long Maun Hagen i bin bung wantaim long makim de bi-long Haus Krai, we i bin kamap long olgeta hap bilong PNG.

Long Holi Trinita Demonstresen Skul, ol sumatin i bin wokim ol posta na olgeta klas i bin bung wantaim na mas i go raun long Holi Trinita Tisa Koles. Ol pikinini i bin singaut strong tru: "Noken paitim meri" long tripela tok ples. Em long tok Inglis, Tok Pisin, na tokples Melpa. Bihain ol i bin harim toktok bilong ol tisa long man na meri i wankain. Na pasin bi-long man i mas rispektim meri na meri i mas rispektim man, bai olgeta i ken painim gutpela sindaun long bihain.

*Poto na Stori – Fr. Phil Gibbs, SVD*





# MTSL meri sapotim Haus Krai

## Buana Ragela i raitim

Planti lain i bin kamap long Se John Guise stedium long Pot Mosbi long soim sapot bilong ol long singaut long gavman long mekim samting long daunim pasin bilong bagarapim meri long komyuniti.

Mis Gima Kimali bilong Sental Provins i go long Se John Guise stedium long Trinde 11 kilok long moning taim wantaim ol wanwok bilong em long Melanesian Trasti Sevis Ltd (MTSL). Mis Kimali i ting olsem "haus krai" ol Women Arise i kamapim em i bilong

gutpela samting i kamap bihain. Tasol sore tru long lukim olsem planti meri i wok long ol opis i no kamap long soim sapot bilong gol long dispela de bikos long wok bilong ol na ol bos i no larim ol long kamap.

Mis Gima i save lukim pasin paitim meri long family bilong em yet na tu long ol wantok i stap klostu, na bikpela tru em pasin bilong man paitim meri bilong em.

"Em i bikpela samting long sapotim "haus krai" long makim maus bilong olgeta meri olsem gavman bai i ken harim na ol i ken yusim pawa bilong ol long kamapim moa

strongpela mekim save long ol lain husat i save kamapim dispela hevi long pasin paitim na bagarapim meri long kantri," Mis Gima i tok.

Em i tok, olgeta komyuniti i mas kirap na ripotim hariap olgeta kain pasin bilong paitim na bagarapim meri we ol i lukim. Dispela kain pasin bai stopim hariap pasin bilong paitim meri. insait long ol famili, ol papa mama i mas givim strongpela skul long ol pikinini bilong ol taim ol i stap liklik yet na lainim ol long laikim ol narapela lain na rispektim ol na dispela bai kamap pasin bilong ol taim ol i kamap bikpela

bihain.

"Olgeta samting i save stat long haus," Mis Gima i tok.

Em i tok moa olsem long em bai go het yet long sapotim dispela pasin bilong daunim pasin bilong bagarapim meri na em bai tok pait long stopim. Em bai tokaut long ol famili bilong em na ol lain i stap klostu lon gem long stop long paitim na bagarapim ol meri.

"Em i driman na laik bilong olgeta Papua Niugini em long stap wantaim bel isi na gutpela ples i nogat pret na wakabout i go i kam fri long siti na noken pret long wanpela man." Gima i tok.



**Yut, Meri  
na Famili**

**Pastor  
Barbara Lunge**

## Pasin Spak brus na bia i bagarapim laip

SAPOS yu save smokim spak brus o yu save dring planti bia tumas o arapela kain pasin olsem na yu laik senis, em i gat rot i stap.

Planti lain insait long nesen bilong yumi nau i gat bikpela hevi long pasin bilong smokim spak brus o sampela kain drag ol i wok long kisim. Dispela em i no gutpela tumas long yangpela kantri bilong yumi na yumi mas stopim.

Mipela ol lida man, meri mas traim olgeta rot bilong pinisim olgeta dispela ol pasin nogut i save kamapim pait insait long haus na bringim bagarap na indai long ol meri na pikinini.

I gat planti as bilong wanem na ol lain i save laik smokim spak brus na ol arapela drag. Ol i gat hevi na i wok long painim drag long lusim tingting long hevi bilong ol.

Planti bilong yumi i save karim ol bel hevi na wari bilong marit o famili lain bilong yumi i bagarapim yumi. Tasol yu no nap long stap na tingim bipo o krai long samting i kamap pinis na yu no nap long stretim. Yu mas kamap man na meri tru na i wok long sindaun bilong yu, na bai em i ken bringim senis na bel isi, gutpela helt na amamas i stap oltaim wantaim yu.

Gutpela we stret long painim senis, em long tanim bek na luksave long man husat i kamapim. Tok piksa olsem sapos kar bilong yu i gat bagarap, yu save oda long spea pat long Siapan long stretim bikos em ol i wokim long Siapan. Tasol bodi na laip bilong man em i kam long God, olsem na yumi mas go bek long God long stretim.

Marit man na meri i mas gat pasin bilong lusim rong. Papamama i mas lusim rong bilong pikinini na pikinini i mas lusim rong bilong papamama. Ol pikinini i kamap long famili marit i bruk, i mas lusim rong bilong papa o mama bilong ol, long em i lusim ol i go. Planti arapela samting tu i kamap olsem kalabus long yu na family bilong yu, na yu mas lusim rong na bai yu fri.

Buk Matyu 6 na lain 14 na 15 i tok, "Sapos yupela i lusim rong bilong ol arapela manmeri, orait papa bilong yupela long heven em ai i lusim rong bilong yupela tu. Tasol sapos yupela i no lusim rong bilong ol arapela manmeri, orait Papa bilong yupela em tu bai i no lusim ol rong bilong yupela."

Planti pipel i wok long kisim sik na dai long pasin bilong holim rong bilong narapela. Yu lusim rong bilong ol husat i mekim rong long yu na bai yu kamap fri.

Tasol em i mas stat long ol bikpela man, meri. Papa na mama i mas namba wan long askim ol pikinini bilong yumi long lusim rong bilong yumi, long yumi lusim ol na go painim amamas na gutpela sindaun bilong yumi yet. God bai kotim yumi long laik bilong yumi i mekim yumi long lusim wok bilong yumi long lainim ol long kamap ol gutpela lain bilong pretim God, na mekim gutpela wok kamap long kantri na famili.

Malaki sapta 4, lain 5 na 6 i tok, "Dispela De bilong mi em i bikpela De na bai mi mekim olgeta manmeri i pret nogut tru. Tasol pastaim bai mi salim profet Elaija i kam long yupela na bihain dispel De bai i kamap. Na bai em i mekim ol papa na ol pikinini i kamap wanbel, na bai mi no ken bagarapim kantri bilong yupela."

Em toksave long olgeta papamama, pikinini, famili, komyuniti na nesen long daunim ol yet na lusim rong na kamap fri long nem bilong Jisas.

**Sapos yu laik save moa; toktok wantaim wokeri bilong Bikpela, Barbara Lunge, Rivers of Grace intenesenal Ministri. P.O. Box 3063. Boroko. NCD. Papua New Guinea. BMob 67331426 O Digicel 71075829.**




Ol meri long MTSL tok stop long bagarapim meri.



GILLARD long Gerehu maket.





# “DEATH PENALTY i no rot bilong stretim asua”

TUDE PNG i bungim wanpela kain hevi we i no bin stap long taim bilong indipendens i kam i nap nau.

Yumi lukim iekonomik o wok mani i na unemploimen o planti man i nogat wok i go antap tru, na yumi lukim ol manmeri i dai olsem ol enimol.

Yumi lukim vilens agensim ol mama na pikinini, na abius o pasin bilong bagarapim i go bikpela, alkohol na smuk nogut i stap long olgeta hap bilong PNG

Kalt bilong Sanguma bilip i kamap bikpela na planti ol mama na ol man i dai nating long ol kain giaman ol sut toktok.

Pasin bilong reip na dai i go bikpela moa na sosel seting bilong komyuniti i bagarap pinis. Ol mama i nogat fridom long wok-about long ol yet long strit na long gaden, kolektim paiawut o pulumapim wara.

Ol i stap wantaim bikpela pret long ol pikinini bilong yumi yet.

Dispela kain ol hevi i givim wanpela kain

sainmak long wol pinis na wol i luksave pinis wanem kain lain i stap long PNG.

Dispela kain ol pasin nogut bilong PNG i stap pinis long wol nius, Radio Australia, BBC News na i stap pinis iau bilong Yunaited Nesen (UN) na ol arapela bikpela intanesenel oganaisesen. Dispela ol hevi em i no bilong nau tasol, Nogat!

Em i bin i stap pinis na i gat bikpela aiwara i kapsait long mekim kantri bilong yumi tasol ol politisen i no bin mekim wanpela muv long stretim kwik.

Nau tasol ol i driman i stap na kirap nogut na laik pasim wanpela Bil nogut long kamapim DEATH PENALTY.

Det Penelti em i no ansa bilong stretim na sapos em legisletim em bai agensim

Fundamental kristen prinsipel long Loa namba 6: 'Yu noken kilim manmeri nating.'

Olsem Angliken Sios nau i sanap redi long sapatim Romen Katolik Sios long tok NO! long Death Penalty --.

Singaut nau i go long olgeta sios na NGO long na "tok no" long det penelti.

Sapos gavman bilong yumi i gat strongpela tingting tru na laik daunim ol dispela ol kain hevi kantri i wok long bungim, i gat rot long stretim;

1. As tru bilong hevi nau i wok long bungim em korapsen. Yumi lukim pinis bilian na bilian kina i lus nating long Waigani na gavman i no bin ltok oraitim wanpela kain bil long putim det penelti long ol dispela stil man. Las wik tasol yumi harim olsem 9 bilian kina i lus namel 2007-2011. Nain (9) bilian kina i lus nating long han bilong ol stilman. Wankain long baset bilong yumi. Sapos Nesenel Baset i makim 12 bilian na populesen bilong yumi 7 milian, tasol dispela ol bilian kina i go long wanem hap, kantri i bungim ol dispela hevi. Yumi lukim

olsem dispela bilian kina i lus nating na sevis i bin kamap klostu 80% populesen i stap long ol ples. Em nau i gat baret namel long gavman na yumi pipel, olsem na hevi i wok long kamap.

2. Em dispela wok bilong Sios na Stet Patnasip. Gavman i tok tasol na i no bin iputim ol mani i go long ol sios bilong mekim ministri long daunim ol dispela hevi.

3. Unemployment -- Gavman bilong yumi i mas pinisim ol forena ol lain bilong narapela kantri husat i kam insait long PNG na mekim ol wok na bisnis inap ol lain bilong yumi yet i nap mekim. Olsem yumi lukim unemploimen i go antap tru na hevi i stap klostu klostu tasol.

# Luteran Yunivesiti bilong PNG bai stat long kirapim ofis na haus

By Sanang Zazoring

**LUTERAN YUNIVERSITI bilong Papua New Guinea, i kisim tok orait pinis long statim ol nupela haus na ofis long Tunde, 14 Me, 2013. Het bilong Luteran Sios insait long Papua Niugini, Rev. Giegere Wenge, i kisim nem bilong Gutnius Luteran Sios bilong Enga, i givim sain bilong kirapim wok taim em i paitim namba wan hap plang insait long graun.**

Wanpela bilding kampani, "The Noserida Limited Building Construction" insait long Lae, i bin winim kontrak long stat wokim ol 3 o 4 haus wantaim ofis na administretiv bilding kompleks na dabol dormi-

tori bilding long Martin Lutheran Seminary graun.

Dr Brent Kilback -- ekt-ing projek darekta na Mr. Apeke Taso -- asosiet projek darekta, i singautim pres konfrens na tokaut long tingting bilong Luteran Yunivesiti bilong Papua Niugini olsem wok bilong ol haus na bilding i stat na kirap nau.

Wok bilong Luteran Yunivesiti bilong Papua Niugini i bin kisim longpela taim long plenim gut moa long 10-pela yia stat long 2005. Bihainim dispela plen, nau kaikai bilong wok i kamap pinis taim kantri bai lukim stat bilong wok long kirapim ol haus. As bilong dispela plen em long kamapim gutpela rot bilong kisim save, bai i gat



Ol i sanapim mak long kirapim wok gohet long nupela Yunivesiti...

wok resis bilong kisim save na mak na level bilong edukesen i antap tru wankain olsem arapela yunivesiti insait long Papua Niugini.

Insait long dispela pres konfrens namel long ol bikpela man bilong sios na yunivesiti plening ofis olsem projek darekta, Dr Kilback na Mr Taso i tokaut long wanem ol bikpela samting bai i bung na kamapim yunivesiti olsem wanpela bikpela institusen bilong sios na kantri olgeta. Emblem bilong yunivesiti i sanap olsem, "Learning Through Research and

Teaching," i givim bikpela salens long husat ol studen bai kisim save long level bilong skul i antap dispela yunivesiti bai givim.

Namel long 12,000 i go 15,000 studen i no save kisim sans bilong go long ol yunivesiti, na Luteran Yunivesiti bai helpim planti bilong ol i kisim save bilong yunivesiti mak. Dispela yunivesiti bai mekim wok patnasip wantaim Gutnius Luteran Sios bilong Enga wantaim Evanselikol Luteran Sios bilong Papua Niugini na nesenol gavman aninit long dipatmen bilong edukesen.

Long nau Luteran Yunivesiti i wok wantaim gavman aninit long Morobe Provinsel gavman husat i putim bikpela mani long helpim na kirapim dispela yunivesiti.

Insait long dispela wok bilong konstraksen, yunivesiti bai wokim basket bol kot, voli bol kot na tennis kot long redi long 2014 Saut Pasifik gem bai kamap insait long Papua Niugini. Papua Niugini gavman inap yusim ol dispela fesiliti long ranim Saut Pasifik gen bilong en.

"Luteran Yunivesiti i wok wantaim haia edukesen na

gavman bilong Papua Niugini, long pasin bilong wok gut aninit long transparen long wok bilong lukautim gut mani na givim ripot bilong wok," Bisop Wenge i tok.

Het bilong Luteran Sios long Papua Niugini, Rev. Giegere Wenge i tok, laik bilong ol pipel bilong Luteran Sios wantaim Papua Niugini olgeta i kamap, taim ol bai lukim yunivesiti bilong ol i kirap taim olgeta wok bilong bilding olsem, administresen ofis, klasrum na domitori i pinis na akademik program bai stat.



# Ts, ts, ts, nau mi save!

## Tim Scott bilong SIL i raitim

**TAIM ol lain long Kuni i lainim nupela samting, em ol i save bekim wantaim dispela nois, 'ts, ts, ts'.**

Moa long 2000 Kuni tokples lain long hap bilong Lek Mari insait long Westen Provins, nau i lukim 55 pesen bilong Niu Testamen Baibel i kamap pinis long tokples bilong ol yet. Dispela i no isipela wok, bilong wanem, ol toktok long tokples bilong ol sampela taim wanpela hap tok em i save gat planti mining na yu bai yu harim nek i go antap o i kam daun taim yu kolim dispela hap tok.

Sampela taim long yia 1989, SIL i bin kisim wanpela singaut i kam long ol Kuni pipel long Lek Mari long Westen Provins, long salim sampela lain i go na helpim ol long raitim tok ples bilong ol na tanim baibel i go long tok ples bilong ol. i gat olsem moa long 2000 lain i save tokples Kuni i stap long ol poin na ailan bilong Lek Mari, em i bikpela lek tru long Papua Niugini. Ol pipel bilong

Kuni i save tokples Kuni-Boazi. Roland na irene Fumey statim wok namel long ol long 1990. i gat narapela tokples Kuni tu long Sentral Provins, tasol tupela i no wankain, nem tasol i wankain.

Taim tupela i bin statim wok tasol long hap na wanpela man bilong helpim ol i tokim Roland, "Dispela hap tok i minim olsem, em i go."

Nau, Roland na Irene Fumey i luksave olsem dispela tokples i gat kainkain stail bilong toktok long senisim nek tasol na sem hap tok bai minim narapela samting. Stat long dispela taim, ol tupela i bin luksave long moa long 100 kain ol tok wantaim kainkain mining. Tasol em i kisim planti yia long luksave long olgeta nek bilong tok ples.

Long taim ol i statim wok, tupela marit i putim mak antap long ol hap tok long helpim tupela bikos ol i hat long tingim wei bilong kolim gut ol hap tokples.

Tasol wanpela taim, Roland i wok long ridim wanpela samting insait long haus lotu na narapela wanwok bilong em i kirap tokim ol

pipel olsem, "Yupela harim, olsem wanem na em i save gut long kolim stret tok, na we long go antap na we long go daun wantaim nek bilong em? Em bikos em i putim ol dispela liklik mak antap long ol toktok bilong em." Olsem na em i kamap klia nau olsem ol dispela mak long ol hap tokples i mas go daun long pepa na olgeta lain bai save bilong wanem, ol tu bai painim hat long ritim na save long mining.

Roland na Irene Fumey i save yet olsem tupela i mas bungim olgeta lain sios long kainkain lotu i tanim tok ples, olsem bai planti moa lain i ken wanbel long dispela tanim tok. Nau ol i gat tripela grup sios lida long i kam long 4-pela sios na sikspela Kuni ples, i wok wantaim long ritim gen tanim tok baibel long tokples.

Planti taim Roland na Irene i save harim "ts, ts, ts" long ol poroman bilong ol long Kuni, taim ol i harim wanpela samting we ol i no bin save gut long pastaim.

**Tupela yangpela meri lainim rit**  
*Poto: Sil*



Ol liklik pikinini bilong Kuni bai ritim baibel long tokples.



## Lo skul go het long bildim nupela oditorium

LIGEL Trening Institut i go het pinis wantaim wok bilong bildim wanpela nupela oditorium bilong inapim bikpela namba ol graduet bilong en.

Dairekta bilong LTI, Misis Pauline Mogish, na mausman bilong LTI Kaunsil, Sir Kina Bona, wantaim ol arapela lo na jastis sekta bikmanmeri i bin stap long makim brukim graun bilong dispela wok.

Misis Mogish i tok dispela bilding bai ol i mekim bihainim ol nid bilong skul stret.

Em i tok tenkyu long Lo na Jastis Patnasip (PALJP) long halivim ol i givim long dispela bilding projek, na i tok em bai givim bikpela halivim tru long daunim hevi bilong nogat spes bilong ol sumatin.

Namba bilong ol nupela sumatin i wok go antap olgeta yia.

Misis Mogish i tok tu olsem LTI kaunsil i bin halivim wantaim baim bilong ol sia na tebol samting inap long K250,000 long baset bilong en.



## Mitim PM Gillard

OL meri sumatin bilong Marianville Sekonderi Skul long NCD i bin gat gutpela sans long bungim Praim Minista bilong Australia, Julia Gillard, taim em i kam long Mosbi las wik. Mis Gillard i bin kam long strongim pasin pren namel long Australia na PNG, wantaim luksave long strongim planti moa wokbung wantaim. Ol sumatin bilong Marianville i bin amamas tru long bungim Mis Gillard. (Poto: AAP Images)





**I OLSEM:** Tresera bilong Australia gavman, Wayne Swan i tok kliia long ol niusmanmeri long Australia, long baset bilong kantri. Dispela baset bai lukim ol manmeri bilong Australia i skelim tingting long votim bek gavman bilong Julia Gillard, o nogat, long ileksen long Septemba.

Mista Sharif i bin tok promis tu long givim olgeta sapot bilong Pakistan, long taim Amerika na NATO bai kisim bek ol soldia bilong ol long Afganistan pastaim long pinis bilong yia bihain.

Tasol em i gat wanpela hevi em i stap long wokbung wantaim Amerika, em long balus bilong pait, nogat man i pailot long en, i save karim bom na tagetim ol Taliban na al-Qaeda paitman na atekim ol long hap i go long not-westen rijen bilong kantri.

Ol i no laikim ol dispela kain pait o atek long Pakistan, long wanem ol manmeri nating i save dai long em na planti pipel i lukim olsem em i soim kain pasin long ol i nogat rispek long em olsem em i wanpela independen kantri.

Presiden bilong Pakistan i tok bai ol i sindaun na holim toktok wantaim ol fren bilong ol, bilong Amerika, na toktok long dispela isiu.

US Stet Sekreteri, John Kerry, i wok long bilip strong bai em i go long Pakistan taim nupela gavman i stap mekim wok bilong en pinis.

### Vanuatu turis loa na oda

VANUATU polis i statim ol bikpela wok long bringim bek loa na oda long Port Vila bris.

Siaman bilong Vanuatu Turisim Opis, Noel Faonalave, i toktok long hevi ol turis i save bungim taim ol i kamap na laik kisim ol teksi long Vanuatu.

Mista Faonalave i tok Polis long Vanuatu nau i statim ol wok lukaut long bikpela bris long Port Vila long bringim bek loa na oda.

Dispela strongpela wok lukaut i bilong stopim kain pasin bilong sampela teksi draiva i save singaut na fosim ol turis long go insait long ol teksi bilong ol.

Moa long 100 ol bikpela Krus Sip i save go stap long Vanuatu long wanwan yia, na dispela i save mekim planti teksi draiva i save resis long karim ol turis.

Vanuatu turisim opis i tok ol i wari long dispela kain pasin, olsem na ol i askim polis long halivim long daunim dispela pasin.

### Australia PM pinisim raun long PNG

PRAIM Minista Gillard i pinisim tupela de raun bilong en i go long Papua Niugini, namba wan raun bilong wanpela Australia PM bihain long faipela yia.

Mis Gillard i bin mekim laspela raun bilong en i go long Bomana Woa Semeteri ausait long biktaun, Pot Mosbi.

Ol i bin planim klostu samting olsem 3,500 ol Australia pipel long dispela ples matmat, na dispela namba i winim namba long ol narapela ples matmat long Komonwelt (Commonwealth).

Praim Minista Gillard i bin putim wanpela bikpela karamap flawa long matmat, na bihain, em i bin go lukim matmat bilong tripela soldia, na wanpela long ol em bilong wanpela nes, Sister Marie Craig, husat i wanpela meri, tasol em ol i bin planim long dispela matmat.

Mis Gillard i bin tok olsem em i bin amamas olsem em i bin gat taim long go lukim Bomana Woa Semeteri.

"Mi kam hia long PNG long makim taim bipo bilong mipela, na long strongim bihain taim bilong mipela.

"Mi amamas olsem mi gat sans tude long kam na givim luksave bilong mi, na kantri Australia, long ol husat i bin givim laip bilong ol long kisim fridom yumi gat tude."

### Vanuatu Midia Asosiesen i toktok wantaim praim minista

MIDIA Asosiesen bilong Vanuatu i holim pinis miting wantaim Praim Minista Moana Carcasses Kalosil long hevi bihain long ol i bin rausim wanpela sinia niusman long wok bilong em.

Moses Stevens, em i Deputi Presiden bilong Midia Asosiesen bilong Vanuatu na tu, em i Presiden bilong Pasifik Ailans Nius Asosiesen i tok i nogat wanpela komplem i bin kamap na polis i bin arestim Gratien Tiona.

Polis i bin pulim kalabusim Gratien Tiona long wanem em i bin putim wanpela toktok agensim gavman long intanet long wik i go pinis.

Ol i bin sutim tok long Mista Gratien Tiona, long putim wanpela toktok long Facebook o intanet olsem em i pre long wanpela balus em i bin wok long karim ol Vanuatu Kaunsil bilong ol Minista long pun-daan na bagarap.

Mista Stevens i tok gavman i no bin wanbel tru wantaim dispela toktok bilong Mista Gratien, olsem na polis i bin pulim kalabusim em.

### PNG i redi long Haus Krai De

OL PIPEL long Papua Niugini i wok long redi nau long holim bikpela bung bilong makim Haus Krai.

Tude, ol meri na pipel bilong Papua

Niugini i statim namba wan hap long bikpela bung na mas long planti hap bilong kantri long soim tingting no laik long vailens o pasin pait, agensim ol meri.

Bikpela mas i kamap asde, na ol PNG pipel long ilevenpela kantri long Wol, wantaim tu Australia, bai holim wankain mas olsem dispela i kamap long Mosbi.

Sampela non gavman ogenaisesen bilong Australia i sapotim ol mas em bai kamap long sampela siti long Australia.

Esther Igo, wanpela memba bilong Women Arise PNG, na meri husat i go pas long redim dispela bikpela de, i mekim ol awenes oa toksave long wari bilong vailens agensim ol meri i tok, tai mi kamap pinis bilong olgeta pipel wantaim gavman long wokbung long stopim dispela pasin nogut.

Wanpela Palamen Memba na Gavana bilong Oro Provins, Gary Juffa i tok olsem, gavman i mas kamapim ol loa bilong givim strongpela mekimsave long ol pipel husat i save repim na kilim ol meri na pikinini.

### Swan bai tokaut long 10-yia baset plen bilong Labor pati

FEDERAL Tresera bilong Australia, Wayne Swan, bai yusim taim bilong baset long tokaut long plen bilong tenpela yia long we bai em i fandim rifom bilong Gonski edukesen na dispela Disabiliti Kea skim.

Mista Swan bai tokaut long hamas mani i sot long baset, na olsem, em bai tokaut long we long bihainim na bringim win mani o seplas, sapos Labor i winim Septemba 14 ileksen.

Dispela disability kea skim na Gonski

skul fanding plen em bai bikpela samting long toktok long en long baset.

Mista Swan bai tokaut long tingting long we gavman i fandim ol dispela tenpela yia bihain, em i tok long en bai kamapim ol bikpela seavings long en, na go wantaim ol katim em ol bai tokaut long ol pinis.

### Nawaz Sharif bai strongim wokbung wantaim Idia, US

NUPELA praim minista bilong Pakistan i tok promis long gutpela wokbung namel long em, India, na Amerika.

Mista Sharif i tok em i bin holim longpela toktok wantaim India Praim Minista, Manmohan Singh long Sane, we tupela i bin salim askim long tupela yet long mekim lukluk raun i go long tupela kantri bilong ol.

Taim wanpela India niusman i askim em sapos em bai askim Singh long go stap long seremoni bilong em long mekim tok-promis long kamap lida bilong kantri, Mista Sharif i tok em bai amamas long salim invait o askim, i go.

Em i tok em i gat tingting pret long sait bilong yu na tu, em i gat tingting pret long sait bilong m, em i tok long wanpela bung bilong ol niusmanmeri long haus bilong em ausait long Lahore.

Em i tok tupela lida i bin skelim gut tingting na toktok long adresim dispela isiu.

Tupela kantri wantaim, India na Pakistan, i gat ol samting bilong pait, em i gat nuklia na tupela i bin pait pinis long tripela woa, tupela woa ol i bin pait long kros long Kashmir long ol Himalayan maunten.

**WANTOK**  
**KOMENTRI**

**Nesanel Haus Krai em i krai bilong senis**

INAP em inap.  
Dispela hap tok, em dispela wik em i krai bikpela tru. Tunde nait i makim namba wan sindaun bilong Nesanel Haus Krai. Wampela bung bilong strongim luksave agensim pasin pait na bagarapim ol meri.

Astingting bilong dispela 'haus krai', em bilong tok agensim, na askim gavman long mekim senis long ol loa i bosim kain ol paul pasin olsem reip na paitim meri.

Insait long tupela mun i go pinis, mipela i harim stori bilong kain kain ol pasin nogut ol man i mekim long ol meri na pikinini meri bilong yumi.

Em i no samting bilong apim nem bilong kantri. Nogat. Em i birua. Dispela haus krai, em planti arapela hap bilong kantri i luksave long en, na i kamap.

Na i no pinis long Mosbi tasol. Nogat.

Ol PNG komyuniti long ol arapela kantri tu i givim luksave long dispela de, na dispela haus krai.

Krai bilong lukautim ol mama, susa, na pikinini meri bilong yumi em i no krai nating.

Na bikos em i sut long mama bilong yumi, em i krai we i karamapim planti ol arapela samting we i no sindaun stret insait long komyuniti na kantri bilong yumi tude.

Pasin bilong i no luksave long ol bikpela bilong yumi, na pasin bilong bihainim tingting na paul pasin bilong ol arapela kantri, nau i bagarapim ol yangpela bilong yumi pinis.

Kamap bilong ol nupela rot bilong toktok, autim tingting, na opim het, i gat gutpela na nogut bilong en.

Nau em i taim bilong strongim ol gutpela, na banisim ol pipel bilong yumi long ol nogut.

Ol lain manmeri i go pas long ol dispela haus krai bung, i tokaut pinis olsem pasin birua agensim ol meri, i mas pinis.

Wankain tu, pasin bilong daunim yumi ol PNG manmeri insait long kantri bilong yumi yet, i mas pinis.

Olgeta birua yumi wok lukim kamap insait long kantri, nau i stap ples klia olsem ol asua bilong nogat luksave.

Ol tingting na pasin bilong ol arapela kantri, i wok bagarapim tingting bilong yumi, na nau, yumi mas senis.

Senisim tingting, senisim luksave, na senisim toktok na bilip bilong yumi.

I gat planti samting i no stret long kantri bilong yumi.

Na i nogat narapela kantri bai kam na halivim yumi long painim nupela rot. Em i stap long yumi yet.

Sapos yumi no inap painim dispela nupela rot long gutpela sindaun, bai yumi lus olgeta.

Krai bilong haus krai, em i krai bilong sore, tasol em i krai bilong sanap strong tu.

Yumi noken abrus na lus tingting long haus krai, bihain long em i pinis. Wankain tu, gavman bilong Peter O'Neill i noken abrus.

Dispela krai, em i no krai bilong wampela de, o wampela wik tasol.

Em i krai bilong ol tumbuna bilong yumi long bipo, bilong yumi i stap tude, na bilong ol lain tumbuna bilong yumi i kam bihain.

Em i krai bilong senis.

**Yumi mas rispektim Nesanel Haus Krai, na yumi tu mas senisim pasin!.. Tenkiu ol mama long kamapim dispela bung!!**



Ol mama i sindaun na autim wari bilong ol long Nesanel Haus Krai. Poto Nicky Bernard

**WANTOK**

Published Weekly, Thursday, for  
Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579

Email: [editorial@wantok.com.pg](mailto:editorial@wantok.com.pg)  
Websait: [www.wantokniuspepa.com](http://www.wantokniuspepa.com)  
**Pe bilong wampela via. 52 niuspepa**

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Neville Choi

Published at  
Able Building Complex,  
Sec 58 Lot 02,  
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



# Wol nius long Poto



## Oi klos woka i protes

OL ektivis bilong Spenis tred union, UGT (General Union of Workers) i brukim skru na holim han i go antap. Pen long han bilong ol i makim blut. Oi i protes long fran bilong wanpela Mango stua long sentral Baselona (Barcelona) las wik. Oi i autim belhevi agensim ol ritel stua na ol dipatmen stua i save salim ol klos ol i save mekim. Dispela kampani i wok yusim ol klos fektori long Bangladesh, we bikpela birua i painim ol wokman taim bilding ol i wok long en i bruk na kilim moa long 1100 pipel.



## Musik bilong kerot na arapela gaden kaikai

WANPELA musik man bilong Vienna Vestabol Okestra, we i save yusim ol gaden kaikai long pilaim musik, i redim instramen bilong en pastaim long wanpela konser i makim namba 100 anivesari bilong San Miguel maket long Madrid, Spen.

## Klos wok meri stap laip yet

RESHMA Begum, 19, i wanpela meri tasol i stap laip yet 17 de bihain long Rana Plaza bilding i bin bruk i go daun na kilim ol wanwok bilong en. Em i tok stori long wanem samt-ing em i mekim long stap laip aninit long ol bikpela ston na simen.



## Oi spesman kam bek long graun

OL estronot o spesman, Tom Marshburn (Iephan), Roman Romanenko (namel), na Chris Hadfield i sindaun insait long wanpela Soyuz-TMA kapa balus bilong Rasia long kam bek long ples graun bihain long ol i lusim Intanesenel Spes Stesen long Tunde dispela wik.



## No laikim Amerika

WANPELA man i wokabaut abrusim wanpela bikpela toktok we i tok no laik long US nuklia ekraf keria sip, USS Nimitz, husat i raun i go sua long Busan sip-bris, long saut bilong Sol (Seoul), Saut Korea long las wik Sarere. Pastaim long sip i kamap long Saut Korea, Not Korea i bin sutim tok olsem kibung namel long Amerika na Saut Korea presiden em i siknelim kirapim long pasin pait agensim Pyongyang. (Poto: AAP IMAGES)





# JK kamap 60 krismas nau..

Jada Wilson i raitim

Oii, mi lapun nau! Mi lukim planti bubu na skin bilong mi go tudak moa!..Em mekim dispela toktok taim meri bilong em Celina i mekim wanpela hait betde pati bilong JK long National Mesuem Pak long Sarere 11th las wik.

Meri bilong JK i kamapim dispela hait pati we lapun JK i nogat save long en. JK tanim 60 kris-mas long Fraide namba 10 de bilong mun Mas long dispela yia 2013.

Mama i salim toksave long olgeta pikinini husat i stap long wanwan skul bilong ol long narapela provins olsem Yunitek long Lae, Rabaul we wanpela i kamap dokta meri na nambawan pikinini bilong em husat i stap long Bogenvil tu i kamdaun long selebretim betde bilong papa bilong em.

Em i kamdaun wantaim meri na pikinini (bubu) long dispela spesel de bilong JK.

Ankol ET (Emil Tenoa) husat i stap bipo wantaim Yumi FM long was bilong JK i kisim hona long kamap masta seremoni long bikpela de bilong JK i mekim sampela toktok long bipo deis bilong JK.

JK i kamap biknem taim mipela i liklik ol mangi yet long skul , em long taim JK i stap wantaim National Boadcasting Commission (NBC).

Nek bilong em i save pairap gut tru na olgeta manmeri save putim iau tasol long harim em. Long taim em stap wantaim NBC yet, ol i kamapim Kalang FM long stap insait long FM frikwensi.

JK i lusim NBC na joinim NAU FM long kamapim Yumi FM long kirapim tok pisin redio we Kastu na Ankol ET i stap long lukaut bilong JK.

Ankol ET husat i stap wantaim Rait FM bilong CHM i tok, JK em i mento bilong mi long kamap redio man, mi save laikim em tru na em i olsem brata bilong mi stret i kam nau.



Bipo JK i kamap long pati bilong em long Sarere, Ankol ET i ringim JK olsem em bai kam kisim em na tupela bai go long haus bilong em long Hohola na tupela bai holim wanwan glas red wain. JK i tok em gutpela tingting long gutpela de bilong Sarere.

ET wantaim Thomas Lulunguan i ron i go na kisim JK long opis bilong em long PVM long 2mail.

Bipo long dispela de Allan Mulas (olpela wokman bilong JK long Media Kaunsol Opis) nau stap wantaim BSP benk i ringim JK olsem em bai kam lukim em long opis na tupela bai toktok long sampela samting, na JK i rere long em long opis.

Tasol nogat, Allan Mulas i kisim 7-pela miss kol long misis bilong JK na kirap nogut. Em wari tru bikos 7-pela miss-kol long meri bilong JK i mekim na em wari tru, nogut sampela bagarap i kamap long JK.

...Nek yumi save harim taim yumi liklik yet...



Isi tasol em ring i go bek long meri bilong JK na tok, mi sapos long bungim JK long opis bilong em, olsem wanem, sampela rong?..Misis kirap na tokim Alan, noken go long opis bilong em, kam stret long Nesanel Museum long klostu long palamen haus. Mipela i mekim betde saprais bilong JK long hap...Oiii, klostu mi ting narapela samting.. Gutpela tru, bai mi kam long hap.

Sindaun bilong JK, ET na Thomas Lulunguan i go gut i sta na misis JK ringim ET olsem olgeta samting i redi pinis nae m ken karim JK i kam... Long dispela taim JK i pinisim wanpela botol Wain pinis na brata yah em waia liklik..

Nau ol i kalap long kar na ol i tek-off i go long palamen rot na JK i askim, yumi go we? Haus bilong me stap long waigani,.. tasol ET i tok, mi laik go lukim Jamie Maxtone Graham long palamen haus long kisim wanpela K1000..JK em spak pinis nae m tok, em gutpela tingting na em laikim K200.

Nogat, ol i abrusim palamen haus na draiv i go antap long museum na JK kirap nogut long lukim planti kar long kar pak. Em kamaut long kar na kirap nogut long lukim planti ol tumbuna na wantok i sanap i stap.. I gat wanpela bena o palai i hangamap long diwai we i rit,.. "Happy 60th Birthday, Justin Hansu Kili, Welcome!!

JK em nogat moa toktok, em nau save olsem hamas de i go pinis, misis i bin tokim JK, plis noken kam hom eli, kam raun long 11 kilok nait, JK em paul.. tasol nau em save, ol laik stretim betde bilong em long Sarere...

JK em hamas tru long lukim olgeta femili na wokman meri husat i bin stap wantaim long hamas wok em i gat. Em kilim danis long gutpela musik bilong Tolai, ol brata bilong meri bilong em, Celina i kamapim.

**Happy Betde, JK! I gat sampela moa yia i kam yet!!**



Antap: Katun bilong JK i kam long Jada Wilson bilong Wantok Niupepa na JK i kisim Logohu hona long GG.



Hia em ol pikinini bilong JK husat i greduet long wanwan institut ol i stap long en..

1. Liberty Kili Greduet long Yunitek Lae olsem Akitek long 2008.
2. Beatus Kili greduet long Yunivesti ov Teknoji long Lae olsem Sivil Enjinia long 2013.
3. Chelsia Kili greduet long Yunivesti ov PNG long Pot Mosbi olsem Dentis long 2009.



# PNGSDP fandim wara saplai long Saut Flai

**Nicky Bernard  
i raitim**

**MOA 38,000 Pipel long Saut Flai bai amamas long gutpela wara saplai bai ol kism long wanwan haus na komiti bilong ol. Tenkyu long PNGSDP long fandim dispela projek long mani mak bilong K15 milian.**

Long wik i go pinis Sif Eksektiv Opisa bilong PNGSDP, David Sode wantaim ol tim bilong em bin go long Kiunga long givim dispela sekim mani bilong dispela projek.

Dispela projek bilong wara saplai bai inapim 49 liklik ples insait long Saut Flai long Westen Provins. PNGSDP i fandim long 90 pesen na narapela 10 pesen i kam long tripela Saut Flai Kominiti Main Kontiniu Agrimen Tras(CMCA) long Manawete, Kiwaba na Dudi.

“Wara Saplai em wanpela bikpela hevi o problem long ol liklik ples long Saut Flai, ol nogat gutpela wara bilong dring, kuk na dispela save

givim ol kainkain sik insait long komyuniti bilong ol olsem long 2010 we kolera bin kamap long ol dispela liklik ples, “ CEO David Sode i tok.

Mista Sode i tok tu olsem, olgeta pipel long Saut Flai i gat rait long kism gutpela wara bilong dring, kuk, waswas na ol narapela samting, olsem na PNGSDP na CMCA Tras i kamap wantaim dispela projek.

Dispela projek em kamap wantaim ples bilong kism wara long ren, wanwan ples bai gat dispela haus bilong kism wara na join wantaim 9000 lita wara tenk.

Dispela projek bai pinis long 12-pela mun taim na Ok Tedi Fly River Development Program bai lukautim na trenim ol ples lain long we bilong lukautim na stretim sapos i gat bagarap long en.

PNGSDP i gat 63.4 pesen papa long Ok Tedi main, na win mani em kism save helpim ol pipel long Westen Provin long ol dispela kain projek.



CEO bilong PNGSDP David Sode givim sek mani go long ol Siaman bilong ol ples we bai kism wara saplai. Poto Nicky Bernard.



Ol redi long sainim 10-pela projek we bai kam long ol liklik ples long Westen Provins.



Olgeta siaman bilong wanwan projek wantaim ol MoU bilong sanap wantaim PNGSDP CEO, David Sode bihain long ol sainim ol dispela projek. Ol Poto Nicky Bernard.



Wanpela siaman sainim MoU wantaim CEO David Sode.





Siaman bilong Midel Flai i kisim sek mani long han bilong David Sode bilong kisim ol nupela dingi. Poto Nicky Bernard.

# K1 milien fanding long dingi

Nicky Bernard i raitim

**WANPELA** Ten et(18) ples long Midel Flai bai kisim helpim long PNG Sestenabel Developmen Progrem(PNGSDP) wantaim ol longpela dingi o kanu bot wantaim moto bilong ol. Dispela longpela kanu bot em wanpela kain spesol bot ol bai

mekim long Lae. Dispela bot moto nau bai ken karim planti manmeri wantaim ol kago bilong ol bilong maket na tu ol raba kap bilong go salim long maket bilong ol long kisim mani bilong ol. Sif Eksektiv Opisa(CEO) bilong PNGSDP, David Sode bin go givim dispela sek mani mak

long K995,400 long ol komyuniti lida bilong Midel Flai long Fonde wik i go pinis. Mista Sode i tokim ol lida olsem, dispela ol longpela dingi kanu em gutpela na bai karim planti samting bilong maket na planti manmeri ken ksim ol kago bilong go maket na i no olsem bipo we ol liklik lain tasol save

kam long maket long ol kanu bilong ol yet. "Mi ting olsem dispela bai helpim yupela ol ples lain gut tru, i no bai mekim rot bilong yupela isi tasol nogat, em bai helpim yupela tu long kos bilong kam long market na go bek. Dispela ol nupela dingi PNGSDP givim long joinim ol

ples lain long Midel Flai wantaim MV Fly Hope sip long mekim ron bilong go kam long ol wara wantaim ol maket kaikai bilong go long Daru, Kiunga na Tabubil. Ok Tedi Fly River Development Faudesen(OTDF) bai lukaut ol dispela ol projet aninit long wok bung wantaim PNGSDP.



**WELKAM** Ol danis lain bilong ples Boboa i welkamim ol PNGSDP lain husat bin go opim sampela ol bikpela projek bilong ol long ol liklik ples long Westen Provins. Dispela ol ples lain i save long ol han mak bilong PNGSDP. Poto Nicky Bernard.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wangepa singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komiuniti Notis Bod
7:00pm - 9:00pm - COCA COLA GARAMUT
7:00pm - Host: Angra Kennedy

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta
2pm - 6pm - Sarere Avinun Cruz

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...



Ol sumatin long Daru i danis Kiwai long welkam delegesen bilong PNGSDP. Foto: Nicky Bernard.

EMTV Television Guide

FONDE ME 16, 2013

4:57 AM G AUSTRALIA NETWORK
5:00 AM G JOYCE MEYER
5:30 AM G EMTV NEWS REPLAY
6:00 AM G TODAY
09:00 AM CLASSROOM BROADCAST

6:00 PM G EMTV NATIONAL NEWS
7:00 PM G RAITMUSIK
8:00 PM G RESOURCE PNG EP#71
9:00 PM G SOKAXTRA

FRAIDE ME 17, 2013

4:57 AM G AUSTRALIA NETWORK
5:00 AM G JOYCE MEYER
5:30 AM G EMTV NEWS REPLAY
6:30 AM G TODAY

11:20am Grade 8 Science
1:00pm Grade 6 Mathematics
1:50pm Grade 6 Science
2:30pm DEPI Program

SARARE ME 18, 2013

4:57 AM G AUSTRALIA NETWORK

6:30 AM G EMTV NEWS REPLAY
7:30 AM G ULTIMATE GUINNESS WORLD
8:00 AM G YOGA SUTRA EP# 8 Rpt.
8:30 AM G K-WAVE EXTRA EP#2/10

SANDE ME 19, 2013

4:57 AM G AUSTRALIA NETWORK
6:00 AM G EMTV NEWS REPLAY
6:30 AM G IT IS WRITTEN
7:00 AM G HILLSONG



TORO



BIABIA



KANAGE



TOKWIN

Pikinini autim luv bilong ol mama...

Wanpela sumatin long Kaindi Tisa Kolis i tok long wanem samting i bikpela long Mamas De...

Haus krai bilong ol mama...

Asde em haus krai bilong ol mama long autim wari bilong ol pasin bilong kilim dai nating ol mama long sut tok long pasim sanguma na tu paitim meri long

taim bilong kros long haus. Long las wik Sande yumi selebretim Mama's De, tasol dispela selebresen i go daun gut long yumi o nogat? Mama's De i min olsem yumi luvim mama bikos em tasol i hatwok long yumi taim yumi beibi yet. Em i karim yumi olgeta long graun. Sapos nogat mama long graun, husat bai karim yumi? Ating yupela sampela kamap long hul bilong ston olsem na yupela nogat rispektim ol meri na reipim ol na kilim nating tru!

long pasim Death Penalti i mekim wankain ol toktok long bipo tru long taim leit Se John Guise i laik kamapim death Penalti bikos planti kilim dai nating pasin i bikpela long dispela taim. Na gavman i sindaun long dispela loa. Tasol nogat wanpela senis i kamap. Planti lida i dai long han bilong birua, nau ol i kilim nating man o meri long sut toktok bilong sanguma! Sapos wanpela man i pundaun na dai nating long Hagen, sut toktok bai go long turangu wanpela mama o papa husat i stap long Goroka, husat i mekim sanguma na man yah i dai long Hagen...SSsee!! Hau?? Supaman o!!!

Tokwin tasol...

Manusna leia hneysew crossword puzzle grid.

Pasin ol dispela provins bilong yumi:

- List of provinces and regions: MANUS, IS NU BRITEN, BOGENVIL, MILEN BE, WESTEN, IS SEPIK, MADANG, SIMBU, SENTRAL, ISTEN HAILANS, NU AILAN, WES NU BRITEN, MOROBE, NCD, ORO, SANDAUN, ENGA, GALP, WESTEN HAILANS, SAUTEN HAILANS.

Number crossword puzzle grid.

Number crossword puzzle grid.

Ansa bilong las wik Sudoku

Ansa bilong las wik Pasol


Alphabet crossword puzzle grid.

EMTV Television Guide

EMTV Television Guide table listing channels (Australia Network, Joyce Meyer, etc.), times (7:00 PM to 6:00 AM), and program names (NRL Round 9, Classroom Broadcast, etc.).

Ol Program na Kilok i ken tenis oltaim...

# Raun wantaim Kanage olgeta wik



**NEM:** Joshua Malken  
**KRISMAS:** 30 (Man)  
**ADRES:** PO. Box 4132, Destiny F/Ship, Lae Morobe Provins  
**SAVE LAIKIM:** Go Lotu, pilai musik, singsing na preisim God, ritim Baibel, harim gospol musik, mekim gaden na laikim wanpela lotu meri husat i save go lotu long stap wantaim oltaim.

**NEM:** Elijah Hombo  
**KRISMAS:** 23 (Man)  
**ADRES:** Nisol Elementary School, PO. Box 538, Lae 411, Morobe Provins  
**SAVE LAIKIM:** Raitim leta, Pilai soka, Volibol, Harim musik, Ritim Niuspepa, Go Lotu, Tok pilai na mekim pren.

**NEM:** Danny Henz  
**KRISMAS:** 38 (man)  
**ADRES:** PO. Box 4731, Lae, Morobe Provins  
**SAVE LAIKIM:** Pilai gita, Go Lotu, Pilai soka, wokim haus na gaden.

**NEM:** Stanford Jackson  
**KRISMAS:** 18 (Man)  
**ADRES:** Komnaik Stationary Ltd, PO. Box 182, Mendi, SHP  
**SAVE LAIKIM:** Go Lotu, Watsim TV, Pilai ragbi tas, Tok pilai na stori wantaim ol lain.

**NEM:** Dulcie Ben Mandi  
**KRISMAS:** 23 (Meri)  
**ADRES:** M&S Tsang Cash & Carry, PO. Box 19, Madang, Madang Provins  
**SAVE LAIKIM:** Ritim Baibel, Harim gospol musik, Pilai gita, Go Lotu, Serim tok bilong God na ol samting long ol arapela, Wasim klos na Klinim haus.

**NEM:** Mocksy Gudego  
**KRISMAS:** 19 (Meri)  
**ADRES:** C/- Joshua Sono, PO. Box 77, Kiunga, Westen Provins  
**SAVE LAIKIM:** Pilai Musik, Harim musik na ritim buk.

**NEM:** Ivan Gudego  
**KRISMAS:** 17 (Man)  
**ADRES:** C/- Joshua Sono, PO. Box 77, Kiunga, Westen Provins  
**SAVE LAIKIM:** Go Lotu, Harim musik na painim poro.

**NEM:** Peter Kul  
**KRISMAS:** 22 (Man)  
**ADRES:** St. Edward Ambang - C/- PO. Box 28, Banz, Jiwaka Provins  
**SAVE LAIKIM:** Raitim leta, Ritim buk, Pilai gems, Tok pilai, Harim musik na watsim TV.

**NEM:** Junior B. Dii  
**KRISMAS:** 31 (Man)  
**ADRES:** College of Distance Education, PO. Box 2071, Yomba, Madang Provins  
**SAVE LAIKIM:** Go danis, Harim musik, Watsim TV, Tok pilai, Kisim wara na go swim

**NEM:** Yakias James  
**KRISMAS:** 18 (man)  
**ADRES:** Annia Village C/- Kanabea, Catholic Mission, PO. Box 220, Kerema, Gulf Provins  
**SAVE LAIKIM:** Ritim Niuspepa, Pilai musik, Pilai soka, volibol, basket bol, Harim Stori.

## Buddy Kanage em bos stret bilong skul Gate!

BUDDY Kanage em wanpela strit mangi long Apo kantri.

Edukesen i abrusim em pinis. Em man bilong raun long strit na salim buai na simuk. Liklik wansling em i kisim em i save tromoi long 6 peks long Bintangor Trading long Goroka.

Long wanem em wanpela ful sapota bilong ol mangi Apo stret - Goroka! Em i nogat femili. Ol wokman i save wetim potnait, tasol buddy kanage em nogat. Em i savekisim mani long seven deis a wik. Yu ting wanem? Kanage, em fit mangi stret, the buai seller. Na wanpela taim em i dring na spak nogut tru na em i kam sanap poro-manim skul get. Ol mate bilong em, ol i strit mangi i lukim em na wokim pani long em. Tasol kanage em bikpela mangi na olgeta manmeri i save long em. Na em ino wari, em tu i wokim ekstra pani antap gen. Ayol Maski, bikpela nois tru i kamap. Olgeta manmeri i save em buddy kanage tasol! Na i wok long pris long ol manmeri. Kain olsem wanpela edukesenis bilong strit.

Nau wanpela poro blong em i salensim em liklik na em i no wanbel. Em bikpela mangi ya! Na em i tromoi hap inglis long poro bilong em olsem. "Yu wana salens mei. No! no! no! I do not like dizz. Respect 35 and make 34" Man ol manmeri kirap nogut tru olsem buddy kanage i save long inglis tu ya! No ken traime buddy kanage, inglis kilim em na stap.



## Mums Kanage, em gel stret

Mums Kanage em eking yang na kam sanap wantaim SP wan botol na salim arrow bilong dat, em 10t tasol long wanpela spia long Suave maket.

Em i singaut istap long ol man i kam baim spia na sutim dat long winim wanpela Maggie kiub. Tasol, nogat man i kam. Ol i save olsem mums em mas on pinis ya. Olsem na wanpela liklik mangi bilong hauslain i kam long trikim em. Em i kam na kisim tenpela arrow long han bilong mums Kanage. Na em i sut i go na ero em i pinis na emi laik go.

Na mums Kanage i askim em long mani bilong baim ol spia na em singaut, "Eei boi, mani i kam, yu no baim ero yet". Mangi ya, em i ting olsem Mums Kanage em i aut pinis na em i no save. Em i laik trikim mums, tasol mums i save pinis. Nau boi ya tokim Mums olsem, "Mums, mi traime han tasol ya". Na mums i inglis long em. "Eei boi, wai and you trick me?"

Mums Kanage em gel stret, noken traime em. Bai yu kisim Inglis.

## Paps Kanage - tokaut na tok stret!

Paps Kanage igo long wanpela konferens bilong ol bikman long ovasis, long toktok bilong HIV & AIDS pro-

gram. Taim em i stap long konferens, em i bin go raun long sait, long ples bilong danis long nait. Konferens i pinis na kanage i kam bek long PNG, na em i go long haus. Na em i givim ol deti klos bilong em long mama long wasim. Orait, mama i sekim ol poket bipo em putim ol klos igo insait long wasing masin. Man, mama i kirap nogut tru long painim ol peket bilong kondom long ol trausis poket.

Orait em i putim ol peket i stap long rum long soim kanage taim em i kam bek long wok long haus long apinun,

Kanage i pinis long wok na kam long haus. Orait, ol pikinini i pilai stap autsait long haus na mama singautim paps Kanage igo long rum na soim em ol peket bilong kondom. Mama i tok; em wanem samting ya? Taim Kanage i lukim ol peket, em i kirap nogut tru na em i tokim mama isi tasol; "Eee, mother noken tokim ol mangi, long bung ol i bin givim mipela olgeta.

Na ai bilong ol planti man na mi sem long tok nogat. Olsem na mi kisim tasol na pulimapim long poket. But, that is for your safety and my safety only". Em wei bilong paps Kanage long saitim tok.

By Phanda, Apo Kantri.

Ol skwat!  
 Salim ol gutpela Kanage tok pilai i kam long:  
**Kanage Tok Pilai**  
 P.O. Box 1982,  
 Boroko, NCD  
 Port Moresby.  
 Email: [jwilson@wantok.com.pg](mailto:jwilson@wantok.com.pg)

# Ol poroman i tok pilai tumas long mi bikos mi patpela tumas

### Dia Laipain,

Mi traime planti rot long traime lus weit o lusim skin bikos mi patpela tasol em no wok. Mi wokim planti eksasais, kisim marasin long kemis, yusim ol kanaka marasin, no kaikaim ol gris kaikai, wok nait, smuk planti na daunim mak bilong wara mi save dring long en.

Ol poroman sumatin i tok pilai tumas long mi na mi pilim sori. I gat narapela rot o ol narapela marasin i ken helpim mi long lusim skin na stap bun?

### Desperate to Loose Weight

### Dia Pren

Mipela i luksave olsem yu no amamas na yu no pilim gut, moa yet, taim ol narapela man meri i tok pilai long yu olsem yu patpela. Yu mas save pinis olsem sampela lain i save hariap long kamap patpela na sampela em bai nogat, maski ol i kisim planti kaikai. i luk olsem yu stap long nambawan grup na i min olsem yu mas mekim samting long lusim skin, o yu noken putim moa skin.

Yu tokim mipela long planti ol samting yu save wokim long lusim skin. Dispela em ol gutpela tingting, tasol i gat sampela samting mipela i no wanbel wantaim.

Pastaim, yu tok yu stopim yu yet long dringim planti wara. Mipela i luksave olsem dispela i no gutpela samting long yu mekim long en. Yu no nap go patpela taim yu dringim planti



wara. Bodi bilong yu i save yusim planti wara bikos em i nidim em na dispela em i no yusim em save rausim olsem pispis. Ol dokta i tok planti manmeri i no wok long dringim inap wara insait long wanwan de. Wanpela man i sapos long dringim 8-pela glas wara long wanpela de.

Long keis bilong yu, i gutpela long yu i dringim moa wara bikos dispela bai helpim yu long klinim bodi na ol pipia samting yu no nidim long en. Olsem i gutpela yu bihainim edvais bilong dokta na dringim 8-pela kap wara olgeta de.

Narapeal samting yu tok yu mekim em yu smok planti i stap. Sapos yu save smokim moa long 20 sigaret long wanpela de, yu gat bikpela sans long kisim lang kensa. Tasol yu ken kisim tu sapos yu no smokim planti sigaret. Mipela i bilip olsem yu bai lusim smok olgeta.

Yu eksasais planti na dispela em i gutpela sapos yu wokim rait eksasais. Mipela i askim yu long go long wanpela ples bilong eksasais na toktok wantaim bos long dispela ples long wanem kain eksasais i gutpela long yu.

Yu tok yu save kisim ol tablet marasin, tasol yu no tok wanem kain stret. Yu askim mipela tu long tokim yu long wanem kain marasin yu ken kisim, tasol mipela i no ol rait lain long tokim yu. Yu mas go lukim dokta bikos em bai skelim na glasim yu gut na givim yu ol rait edvais long mekim wanem samting, na long kisim ol rait marasin. Em bai wokim ol tes long lukim as long yu go patpela na rot we yu ken bihainim ol progrem long lusim skin.

Pren, i luk olsem yu traime planti samting long traime lusim skin, tasol bodi bilong yu i no senis yet. Sapos yu wok long mekim eksasais na kaikaim ol rait kaikai, noken wari long ol toktok ol narapela manmeri i wokim. Yu traime hat long mekim stretpela samting long lusim skin. Ating Bikman i mekim yu olsem o, sapos yu man bilong laikim stret kaikai, tasol go het long ol progrem na ol samting yu wokim long lusim skin.

### Pren bilong yu Laipain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

### Laipain



# Digicel statim bikpela promosen long K2

## milian

Stanley Nondol i raitim

**BIKPELA** mobile kampani long kantri, Digicel i statim bikpela promosen long givim sans long ol kastoma long winim 8-pela nupela kar wantaim K1milian fri kredit.

Moa long tu milian kastoma bilong Digicel raun long kantri nau stap long bikpela resis long winim 8-pela nupela Toyota Land Cruiser na K1 milian fri kredit we Digicel tok em redi long givim aut long ol kastoma bilong em bihain long 12 ya bilong mekim mobail bisnis long kantri.

Digicel PNG Sif Operating Opisa, Darren McLean taim lonsim dispela bikpela promosen long Mande dispela wik, tokaut olsem 8-pela laki wina bai winim nupela Toyota Land Cruiser na tu ol kastoma bai kisim fri credits long mani mak bilong K1 milian.

Dispela kempen bilong



Ol lenkrusa bilong winim taim yu top ap. *Poto: Nicky Bernard.*

winim kar na fri credits bai ron long 8-pela wiks olgeta, na long wanwan wik stat long Trinde neks wik namba 22 de bilong dispela mun, bai Digicel tokaut long namba wan wina bilong Land Crusier na bihain long en, long wanwan

wik bai gat wanpela laiki wina inap long 8-pela wik.

Long stap insait long dispela bikpela promosen, em isi, taim ol kastoma top ap long K2 go antap em ol gat sans long stap insait long resis. Dispela minim olsem

taim kastoma mekim plAnti top ap em gat plenty sans long winim Toyota Land Crusier.

Dispela em bikpela promosen tru long kantri na stat long dispela wik mande Me 13 na bai pinis long Julai 10.

Nau FM bai kolim ol wina bilong Toyoya Land Cruiser na tu bai kamap long Digicel Pesbuk. Ol kastoma husat mekim top ap mas save olsem nating tru yu stap long resis bilong dispela promosen na mas putim on

mobail pon long ol dispela de we bikpela wina ol bai tokaut:

Me 22, Me 29, Jun 5, Jun 12, Jun 19, Jun 26, Julai 3 na Julai 10. Em ol 8-pela de we Digicel bai tokaut long wina bilong Toyota Land Crusier.

# BSP benk opim nupela mobail benking sevis wantaim ol mobail fon prais

**BENK** Saut Pasifik (BSP), nau bai givim prais long ol kastoma bilong en, sapos ol i yusim mobail benking sevis bilong ol.

BSP bai givim wanpela Samsung Galaxy smat fon na tenpela Nokia Asha mobail fon olgeta wik stat long Me 21.

Dispela nupela promosen na ol prais em bilong strongim luksave long mobail benking sevis bilong en.

Long stap insait long resis long winim ol dispela mobail fon, ol BSP kastoma husat i rejista long mobail benking sevis, i mas mekim wanpela transeksen olsem salim mani i go aut long akaun bilong ol, o i go long akaun bilong ol, yusim long to ap long mobail fon, o yusim long baim easi-pay kredit top ap.

Namba wan wina bilong Samsung Galaxy mobail fon, na tenpela wina bilong ol Nokia Asha, bai ol i tokaut long Me 21.

12-pela kastoma bai winim wanpela Samsung Galaxy, na 120 kastoma bai winim wanpela Nokia Asha.

Bosman bilong BSP EChannels opis, Bram Peters, i tokaut long dispela kempen, olsem astingting bilong en em bilong strongim luksave bilong ol kastoma long yusim mobail benking.

"Yusim mobail benking, em i no dia, em i isi, na em i ken wok 24 awa, olgeta de. Tude, mipela i gat planti manmeri i wok long kam long ol brens yet, na i no yusim ol dispela isi rot bilong mekim wok benking.

"Sapos planti long ol kastoma bilong mipela i no go insait long ol brens, ol brens bilong mipela bai inap lukluk long givim mobeta sevis long



**MOBAIL BENKING:** Nupela mobeta benk sevis, i givim yu sans long winim wanpela Samsung Galaxy smat fon.

ol kastoma. Long luksave bilong mipela, 40% bilong ol kastoma i no nid long kam insait long ol benk brens. Ol i ken yusim mobail benking na ol arapela ilektronik rot bilong wok benking," em i tok.

Mista Peters i tok strongim ol BSP kastoma husat i no rejista yet long mobail ben-

ing, long hariap na rejista.

"BSP Mobail Benking em i nupela smatpela we bilong benk. Long rejista, ringim Kastoma Sevis Senta bilong mipela long 320 1212 o 7030 1212 o salim email i kam l o n g servicebsp@bsp.com.pg," em i tok.



# Wantok

## Advertise your Business right here!!

We deliver your message right to the remote areas of PNG  
where others don't go.

**Wantok Niuspepa** is your medium to communicate your  
business now.

Niuspepa  
Bilong Yumi Ol  
PNG Stret!!





Call the Advertising team on,  
**Ph: 3252500 Fax: 3252579** or  
Email: wantok.com.pg or  
Website:www. Wantokniuspepa.com





# Ramu NiCo tokaut long bisnis wok long ol LANCO long 2013

**R**AMU NiCo Menesmen (MCC) Limited i tokaut pinis long sampela ol bisnis o kontrak wok em bai givim aut long ol lenona kampani (LANCO) insait long Ramu nikel Projek eria long dispela yia 2013.

Kampani i bin tokaut long ol dispela wok bisnis insait long memorandum ov agrimen (MOA) riviui miting we i bin kamap long Jais Aben Risot long Madang long las wik.

Dispela MOA riviui miting i bin ron inap olsem wanpela wik olgeta na i lukim ol lain husat i bin sindaun long dispela bikpela kibung long lukluk na stretim ol bikpela toktok long bisnis bilong Ramu Projek.

Ramu NiCo (MCC), bikpela milien Kina divelopa bilong Ramu nikel/kobalt projek long PNG i tokaut olsem em bai givim aut 14-pela nupela bisnis i go long ol lenona kampani we mani mak em planti milien Kina. Ol dispela nupela bisnis wok em go wantaim arapela 15 we ol lenona kampani i wok i stap yet long en.

Sampela long ol dispela bikpela bisnis Ramu NiCo i givim long ol lenona kampani em long sait long trenspotesen bilong kromait long KBK, saut rot projek long KBK, sivil rot wok, mentenens bilong ol rilokesen haus, rihabilitesen na wok bilong klinim ol eria na katim diwai arere long main eria long wok i kamap. Planti long ol dispela kontrak em i go long KBK Limited, tasol ol i brukim daun tu i go long ol klen kampani.

Long sait long klen kampani bai lukim wanpela kontrak bilong bassevis em Arikori Invesmen Limited mas karim ol viles manmeri namel long Enekwai na Banu. Narapela wok kontrak bilong katim diwai na longing long 25 hekte eria bai go long Imuruba Invesmen Limited na dispela bai lukim ol i mekim wok.

Ramu NiCo i bin tokaut long posisen bilong en las wik, na Deputi Jeneral Menesa bilong Komuniti Afes Dipatmen, Stotick Kamyia i mekim toktok long ol wok bisnis kampani bai i givim aut long dispela yia.

Antap long dispela ol wok bisnis Ramu NiCo bai givim trening tu i go long ol bod ov dairektas (BOD) bilong ol lenona kampani.

Mista Kamyia i tokaut long MOA Riviui miting olsem Ramu NiCo i redim pinis ol program bilong en long karimaut ol trening, tasol hevi



Madang Gavana Jim Kas givim toktok na Usino-Bundi Memba, Anton Yagama i sindaun



Ol lain LOA siaman i sindaun long MOA riviui miting bilong Ramu Nickel Projek.



Vais Presiden na Dairekta bilong Ramu NiCo (MCC) givim toktok long MOA riviui miting



Planti lain i go harim MOA riviui miting

nau i stap long ol lenona asosesin long isi isi tumas long makim ol nupela BOD bilong ol na tu ambrela kampani Raibus Limited.

Em i tokaut olsem Menesmen Sevises Kampani (MSC) i givim notis pinis long ol lenona kampani long redim ol yet long makim ol BOD bilong ol long redi long dispela trening program.

Mista Kamyia i tok olsem dispela trening o indaksen em bilong ol BOD memba long save gut long wok long ol na wanem ol wok ol i

mas mekim. Narapela bikpela samting tu em dispela trening bai givim tingting tu long ol memba bilong BOD long save long posisen bilong ol na noken traime long go insait long kontrolim menesmen bilong kampani.

Em i givim sampela strongpela toktok tu long planti taim ol lenona kampani i save lukim ol dairektas i save suvim het long kontrolim operesen na menesmen bilong ol lenona kampani. Moa long en tu i gat ol klen memba, lida na wan

wan lain i save laik mekim kain samting olsem, na taim kain pasin i kamap turangu planti tausent manmeri na pikinini long ples i save kisim taim.

Mista Kamyia i tokaut tu olsem long sait long ileksen bilong ol BOD em i moa gutpela tu long ol lenona kampani long kisim wanpela autsait lain husat i ken stap olsem independen dairekta long ol dispela wan wan Lenona kampani. Em i moa gutpela olsem ol lain husat i gat gutpela save long bisnis

menesmen na i wok pastaim wantaim ol arapela bikpela kampani i ken go insait long helpim gro blong ol lenona kampani insait long Ramu Projek.

Dispela MOA riviui miting we em namba 4 bilong Ramu Nickel Projek em Mineral Risoses Atoriti i oge-naisim. Riviui i bin stap wantaim Gavana bilong Madang provins, Jim Kas i givim posisen pepa bilong en wantaim sampela tingting we Memba bilong Usino-Bundi na tu Memba bilong Raikos, James Gau i givim.

Ol Siaman bilong 4-pela lenona asosesin (LOA) i bin givim tu ol posisen pepa bilong ol long MOA Riviui Miting.

Dispela MOA riviui miting i kamap gut tru bikos olgeta lain husat i givim ol posisen bilong ol i amamas na putim tingting wantaim long lukim Ramu Projek i giving sevis na bisnis na tu lukim ol lain pipel insait long ol projek eria i kisim helpim na projek i go het long wok bilong en.

Moa long 100 lain husat i makim ol lain LOA, Madang provinsal gavman na edministresen, Ramu NiCo (MCC), na ol lain i makim Stet olsem Mineral Risoses Developmen Kampani (MRDC), Fainens Dipatmen, MRA na tu sampela ol lain bilong pablik i bin go harim ol toktok long dispela MOA riviui miting long Jais Aben Risot Hotel long Madang.

Pastaim Minista bilong Maining, Sam Akoitai i bin stap tu long dispela MOA riviui miting na i tokaut olsem em i amamas long lukim olgeta lain stekholdas olsem ol lain papagraun o LOA i bung na givim ol tingting bilong ol na askim Stet na divelopa Ramu NiCo ol kwesten.

Mista Akoitai i tok pasin bilong sindaun na toktok gut na harim tingting bilong wanpela arapela i ken helpim wok Projek long karim gutpela kaikai we bai planti lain i ken kisim helpim.

Mista Akoitai nau i wok olsem wanpela konsalten o man i givim tingting long wok bilong maining i go long Ramu NiCo (MCC)

MOA Riviui Miting i bin pinis long las wik Fraide wantaim wanpela draft MOA pepa we olgeta lain stekholda i givim posisen bilong ol na wetim tasol posisen bilong Stet (Nesene Gavman) long givim pastaim bipo long ol i givim MOA i go long Nesene Eksekutiv Kaunsil (NEC).

## Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nickel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamak rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

**Ol dispela namba i soim klia mak bilong wok mipela i pinisim:**

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**'Wanpela Ramu NiCo, Wanpela Komuniti'**







Mista Sode toktok long ol wok man bilong em taim narapela i katim Raba diwai na lukim wait pela wara bilong Raba kam aut. *Poto Nicky Bernard.*

# Raba Plantesen senisim Lake Murray

**Nicky Bernard i raitim**

MOA long 20-ples lain insait long Lake Murray long Westen Provins kisim bikpela senis long ples bilong ol taim ol stat long planim na kamapim Raba Plantesen.

Lake Marry na sampela ol liklik ples insait long Westen Provins i lukim kaikai bilong Raba taim ol havestim na karim go long fektori.

PNGSDP i lukim olsem graun na ol ples long Westen Provins i gutpela long planim na kamapim Raba, olsem na em putim bikpela mani go long dispela projek long senisim sidaun bilong ol pipela long hap we sampela taim gavman sevis i no save kisim ol.

Lake Murray i gat planti ol liklik ailan insait long en na dispela ol liklik ailan, graun bilong em i nambawan long Raba gro long en.

PNGSDP, i lukim laikim bilong ol pipel long Lake Murray na askim ol long traim planim Raba long helpim ol long sidaun bilong ol long bihain taim.

Dispela tingting bilong PNGSDP na ol pipel bilong Lake Murray i karim kaikai, nau insait long Lake Murray planti ol liklik divopmen i kamap long Raba plantesen bi-

long ol.

Ol pipel bilong Lake Murray nau ken ron long moto bot bilong ol yet long go long salim ol Raba kap bilong ol long fektori long Kiunga.

PNGSDP tu i fandim dispela bikpela fektori bilong Raba long Kiunga we ol pipel bilong Westen Provins ken go na salim long kisim liklik toea bilong ol.

“Raba plantesen bilong mi i senisim sidaun bilong mi long liklik ailan bilong mi, nau mi ken ron long 60-hos pawa moto na go long stesen na salim sampela moa kap raba bilong mi na mi kam bek long avinun, bipo nogat, bai mipela pul long kanu na go long stesen,” Wanpela fama i tok.

Dispela fama tok tu olsem, i nogat gavman sevis save go long ol liklik ples long Lake Murray klostu long 30-pela yia olgeta, planti gavman lain kam na promis na go na go olgeta.

PNGSDP Sif Eksekutiv Opisa David Sode i tok, dispela Raba projek em bai stap longpela taim, na dispela bai helpim ol bihain taim Ok Tedi Main pas.

PNGSDP em hap she holda bilong Ok Tedi Mine na liklik profit ol kisim save helpim ol projet long Westen Provins na tu sampela hap insait long kantri.

## Moa Balus Olgeta taim

- Lae ↔ Madang Olgeta Dei
- Madang ↔ Wewak Olgeta Dei

Na u ken flai igo long ol taon long ol narapela provins

Ringim telefon 7222151 o go long websait [www.apng.com](http://www.apng.com)

Dispela taim ron bilong balus bai istat long May 20/2013

Airlines PNG

COME FLY OUR WAY



# Luksave long ol spotsmanmeri bilong yu



**L**ong wik i kam, Me 25, bai yumi luksave long sampela ol nambawan spotsmanmeri bilong yumi taim ol i kisim SP Sports Awod bilong ol.

Dispela ol spots manmeri bai kam long ol pilaia, edministreta na ofisol, ol nius ripota bilong spots, nambawan spots poto na tu nambawan spots tim.

I gat 14 awod olgeta ol bai resis long kisim.

Long las wik, Ogenasing Komiti tokaut long tripela man, meri na tim husat i stap insait long fainol bilong winim wanwan awod na long wik i kam bai yumi lukim husat tru namel long ol dispela tripela husat i stap insait long fainol, bai kisim.



### Histri bilong SP Sports Awods

Dispela yia bai makim namba 21 yia bilong SP Sports Awods na tu em i 21 yia bilong SP Brewery olsem mama spona bilong en.

SP Sports Awods i kamap long givim luksave i go long ol spotsmanmeri bilong Papua Niugini husat i save wokhat tru long makim kantri.

Planti bilong ol spotsmanmeri bilong yumi no save wok mani tasol bikpela laik bilong ol long pilai spots na makim kantri bilong ol i save lukim ol i wokhat long trening na tu long painim ol rot bilong bungim mani long helpim trening na pilai bilong ol.

SP Sports Awods i save helpim ol long kisim gutpela luksave bilong kantri na tu long ol spona na ol spots ogenaisesen.

Dispela i save apim mak na rekot bilong ol long kantri na tu long ovasis wantaim.

SP Sports Awods i save givim luksave bilong ol spotsmanmeri bilong olgeta yia.

Ol awod we ol bai kisim long dispela yia bai givim luksave long ol long ol hatwok na gutpela rekot ol i mekim long las yia.



### Hau bai mi helpim long spots awods?

Sapot bilong yu em i bikpela samting, yu bai no inap save long dispela tasol ol manmeri husat i save pilai o mekim wok bilong spots bai tokim yu olsem dispela em i tru.

Sapot i no min mani na ol samting tasol, sapot long sait bilong gutpela toktok na pasin bilong givim luksave long ol gutpela pilaia bilong yu, bai mekim ol i amamas na ol bai pilai gut na strong moa.

Wanpela rot long soim kain sapot tu em long kain ol samting olsem SP Sports Awods.

Ol spotsmanmeri yet i no inap putim nem bilong ol yet i go insait long kisim wanpela awod, dispela bai nap luk gut na tu bai no inap bihainim astingting bilong kisim luksave long ol manmeri na sapota bilong PNG.

Sapos yu laik helpim long givim luksave long gutpela spotsmanmeri bilong yu, orait, yu mas kisim wanpela nominesen fom long niuspepa o long opis bilong PNG Sports Federation & Olympic Committee (PNGSFOC), putim nem bilong man, meri o tim yu ting i mekim gut long las yia na i mas kisim wanpela mak o luksave long en.

Yu mas putim sampela pepa, poto na ol ripot o liklik toktok sapot i go wantaim nominesen fom bilong yu na go lusim long PNGSFOC opis.

Ogenasing Komiti bai bungim dispela olgeta nominesen fom nag vim i go long seleksen komiti husat ol bai skelim na makim husat ol bai kisim wanpela awod.

Planti bilong yumi save tingting olsem, "Mi nominetim em tasol taim em i win bai em i no inap tingim mi long wanpela samtin."



Dispela kain tingting i no gutpela na i save bagarap astingting bilong spots na tu gutpela pasin ol dispela spotsmanmeri mekim long makim yu long ol bikpela gem long ol ovasis.

Ol i givim bikpela taim, mani na hatwok long laik bilong ol long pilai, we i save helpim tu long kisim planti bikpela samting na luksave i kam bek long kantri tu.

Makim ol long kisim wanpela spots awod em i gutpela samting long soim tenkyu na amamas bilong yu long ol.

**SP Awods long dispela yia**  
Olgeta nominesen na seleksen wok bilong ol spotsmanmeri bilong SP Sports

Awods long dispela yia i pinis nan au bai yumi wetim tasol long lukim husat bai kisim wanpela awod long Me 25 long Crown Plaza hotel long Mosbi.

Ol awod bilong dispela yia bai givim luksave long ol hatwok na gutpela rekot na mak ol dispela spotsmanmeri putim long 2012.

Sapos yu no bin putim nominesen bilong yu dispela yia, orait yu was gut long fevret pilaia, tim, spot o edministreta bilong yu long dispela yia nay u ken makim nem bilong em long kisim wanpela long ol dispela awod long 2014.

Yumi mas tok amamas tu long SP Brewery na ol arapela spona husat i wokbung

wantaim PNG Sports Federation & Olympic Committee (PNGSFOC) na PNG Sports Foundation (PNGSF) long mekim dispela SP Sports Awods i kamap.

Bikpela tenkyu tu i mas go long ol spotsmanmeri bilong yumi husat i save wokhat tru, na givim bikpela taim, mani, save, strong na laik bilong ol tu long makim kantri bilong yumi long ol bikpela spots pilai insait long wol.

Husat ol i stap long fainol bilong kisim wanpela spots awod nau, mi laik tok amamas long yupela na husat i winim awod em wanbel na amamas i stap wantaim yu.



# Injuri kaun i go antap long Brisbane

NAMBA bilong ol i wok go daun yet long injuri i birua long bodi long ol pilaia, tasol Brisbane Broncos i tokaut long Tunde dispela wik olsem ol i no wari tumas long hevi i painim nambawan senta Justin Hodges na nupela prop Josh McGuire.

Ben Hannant na saveman faivet Scott Prince bai no inap pilai long gem agensim

Gold Coast long Suncorp long Fraide nait.

Tasol wari i stap long Hodges, husat i wok karim hevi long bun long lek bilong en na i no pinisim gut trening long Tunde.

Sapos Hodges na McGuire i no inap pinisim gut ol fitness tes tude (Fonde), bai KosaAnthony Griffin i gat narapela hetpen.

McGuire i tok ol i wok long lukautim tupela gut.

"Ol i save peim mipela long tren. Ol i save peim mipela long pilai. Na ol i laikim mipela long kisim fil long Fraide nait.

"Medikal staf i wok long was gut long mipela, na mi save olsem mi na Hodgy bai orait long Fraide nait," McGuire i tok.

Yutiliti Ben Hunt i gat sans long senisim Prince.

Hunt i mekim klia olsem em i laik strongim bilip bilong Griffin, olsem em i redi long strongim Broncos taim Prince i sindaun long sait-lain.

Fowet Matt Gillet i tok Hunt i mekim gutpela pilai tru taim em i senisim Prince agensim Parramatta las wik.



PARKER: Kisim bek wok bilong kikman

## Parker i redi long butim Titans

BRISBEN fowet, Corey Parker i tok em i no save pilai long taim em i laik kikim gol, na em i save pilim pen taim em i save abrus long ol kik na ol i save lus.

Bihain long em i lusim wok kikman taim Scott Prince i kam long Broncos, nau ol i sanap namba 15 long ol konvesen na penalti kik.

Parker i kam bek long dispela wok long Fraide nait agensim Titans, bikos Prince bai sindaun wantaim hevi long lek.

Bihain long nainpela raun, Brisbane i wok konvetim 56.3 pesen wantaim Prince (16 long 26 kik); Peter Wallace (1 long 2-pela kik), na Parker (1 long 4-pela kik).

Taim Parker i bin bosim wok kik las yia, em i wok kik klostu 76 pesen, na Brisbane i bin stap namba 9 ples.

Broncos i bin kikim wanpela konvesen tasol long foapela trai bilong ol las wik, na ol i lus long Parramatta. Em nau hevi bilong ol long

kik i kamap ples klia.

Parker yet i tok olsem em na Prince i bin toktok long husat bai kik long pri-sisen.

"Ating em mi yet i bin tok, na mi rispektim Princey long save bilong em long kik," Parker i tok.

"Hook (kosa Anthony Griffin) i tokim mitupela long stretim tok long kik pastaim long sisen i op.

"Mitupela stori liklik na mi pilim olsem i mobeta Princey i kik. Em nau. Mipela i bihainim tasol."

## Nambawan strong bilong mi i kam yet: Barba

BEN Barba i bilip olsem nambawan fom bilong em na Bulldogs, i no kam yet, na em i redi long hitim klostu, na resis wantaim ol top NRL sait.

Barba, husat i bin abrusim ol namba wan raun bilong sisen, i tok em i no hitim yet fom we i bin winim em Dally M Medal las yia.

Tasol em i tok las wik taim ol i kam bek long daunim Warriors long Wellington i gutpela bikos em i bilip gut tru, na em i tok bilip bilong

tim i wok long go antap nau.

"Mipela i bin bilip long hap taim olsem mipela inap long winim gem long seken hap. Em no kamap isi. Tasol em bai kam yet," Barba i tok.

Win bilong ol agensim Warriors i apim Bulldogs i go long namba 8 ples long NRL leda, na i bin wanpela long ol namba wan gem bilong Barba long dispela sisen.

Bulldogs bai smail moa dispela wik, taim namba

wan senta bilong ol, Krisnan Inu i kam bek long bungim Newcastle long Sande bihain long em i sindaun long faivpela gem bikos em i bin mekim spia takol long Greg Inglis.

Barba i tok Inu i wok long tren strong, na em i skin kirap tru long pilai.

"Em i luk fit na strong moa, na mi ting olsem bihain long faivpela wik long kadio na moa trening, em bai kirapim paia long Sande," Barba i tok.



BEN BARBA: Mi bai klostu hitim fom.

## Mipela pretim Benji yet, Souths i tok

SAPOS yu lukluk long pepa, tupela i no wankain, tasol namba wan ples South Sydney i tok ol i gat bikpela pret yet long strong bilong Benji Marshall, na ol Wests Tigers, husat i sindaun long las ples.

Em i wanpela narakain tokaut long tim i lidim kompetisen, tasol taim em i paia, Marshall em i wanpela long

ol namba wan pilaia bilong senisim ron bilong gem, na hat moa long holim em.

Tasol long dispela yia, Benji i wok long pait wantaim ol birua long bodi, na em yet i tok olsem em i no pilaim namba wan gem bilong em yet.

Olsem tasol na dispela wik, em bai sindaun long

bens agensim Souths.

Hitman bilong Souths, Asotasi i tok Benji i ken karim Tigers na givim ol strong.

"Mipela i wok tren na redi nogut em bai kisim fil," em i tok.

Asotasi i pilai pinis wantaim Marshall long intansenel level, na em i save long pasin bilong em.



BENJI MARSHALL: Souths i pretim em yet



# SPOTS DRO RAUN 10

**Fraide: Me 17, 2013**



**Suncorp Stadium**  
Broncos V<sup>s</sup> Titans





**ANZ Stadium**  
Rabbitohs V<sup>s</sup> W/Tigers



**Sarare: Me 18, 2013**



**WIN Stadium**  
Dragons V<sup>s</sup> Eels





**Centrebet Stadium**  
Panthers V<sup>s</sup> Warriors





**Townsville Stadium**  
Cowboys V<sup>s</sup> Roosters



**Sande: Me 19, 2013**



**Toyota Stadium**  
Sharks V<sup>s</sup> Raiders





**Hunter Stadium**  
Knights V<sup>s</sup> Bulldogs



**Mande: Me 20, 2013**



**AAMI Park**  
Storm V<sup>s</sup> Sea Eagles



### Raun 9 Poin Leda

Pos	Tim	W	L	Pts
1.	Rabbitohs	8	1	16
2.	Roosters	7	2	14
3.	Storm	7	2	14
4.	Sea Eagles	6	2	12
5.	Knights	5	4	10
6.	Titans	5	4	10
7.	Raiders	5	4	10
8.	Broncos	4	5	8
9.	Sharks	4	5	8
10.	Cowboys	4	5	8
11.	Bulldogs	4	5	8
12.	Panthers	3	6	6
13.	Dragons	3	6	6
14.	Eels	3	6	6
15.	Warriors	2	7	4
16.	West Tigers	2	7	4



**FM100**  
PNC's Information & Music Leader

**FRIDAY 17 MAY**


Vs


**7.45PM**  
ANZ STADIUM, SYDNEY

**SATURDAY 18 MAY**


Vs


**7.30PM**  
1300SMILES STADIUM

**SUNDAY 19 MAY**


Vs


**2.00PM**  
SHARKS STADIUM

LIVE GAME CALLS

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUJ 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NUC 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATOFA 107.5	NUKU 100.8	TABUSIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8



# Ol Spot Eksen poto long wiken...



Mebo Ipi kisim trofi bilong em long han bilong Helen Macindoe



Ol Poto Nicky Bernard.


Bikpela fowod bilong Isapea traिम banis bilong Guria. Guria win 28-26



Bava pak kam laip taim Alakwin i pilai wantaim ol Sef.



Go malolo, pilai bilong Isapea kisim 10-minit malolo taim em pait long pilai graun



Beta bilong Bears paitim bal tasol em no kisim namba wan bes.

## - Weekend Sports Draws -

### Digicel Cup Round 6

Home	Away	Venue
SUNDAY, 19 MAY		
Bintangor Lahanis	vs. SNS Vipers	Goroka
Gulf Isapea	vs. Enga Mioks	Port Moresby
Agmark Gurias	vs. Wamp Nga Eagles	Kokopo
Hela Wigmen	vs. TNA Lions	Mendi
Snax Tigers	vs. Mendi Muruks	Lae

**TOKSAVE:** Salim ol spots dro bilong yu kam long Feks; 325 2579, e-mel; [bveo@wantok.com.pg](mailto:bveo@wantok.com.pg) o kam lusim long Wantok Niuspepa opis long Able Building Complex long Central Waigani, NCD.





Stop N Shop Vipers i stap long Nesenel Haus Krai long Se John Guise stedium *Poto: CPL*

# CPL Grup i sapatim Nesenel Haus Krai

City Pharmacy Limited (CPL) Grup, em i strongpela sapatim tru bilong givim moa pawa na spes long ol meri bai kamap strong long sindaun na wok bilong ol, insait long komyuniti.

CPL i save sapatim long bikpela wei olsem bikpela awot progrem olsem, Pride of PNG Awot bilong ol meri na tu sapatim, Meri Seif Ples.

Nau bikpela ragbi tim bilong

Mosbi, Stop N Shop Vipers i kam insait na soim wanbel bilong ol long dispela Nesenel Haus Krai bilong ol meri taim ol i kamap long Se John Guise stedium long Tunde nait, 14

Me.

Oi Stop N Shop Vipers tim i singaut long ol man long ol i mas stop long bagarapim ol mama, susa na olgeta meri long PNG sapos ol i man tru.



## Nesenel Soka Lig nogat inap luksave long painim ol nupela talen

LONG taim bilong kirap bilong dispela semi profesinal soka lig i kam inap nau, kwolati bilong ol pilaia ol i kisim bilong makim ol klab, i no luk strong. Ating olgeta klab i no mekim inap wok.

Tingting long baksait bilong NSL em i gutpela, bikos em i resim level bilong spot, tasol kwolati bilong ol pilaia i no wankain. Kantri bilong yumi i no inap lukluk i go longwe long painim gutpela ol strongpela soka pilaia we yumi ken strongim ol i kamap ol soka supasta.

Bikos soka em i wanpela long ol nambawan spot pilai long kantri, em i gat planti savemanmeri bilong pilai i stap. Na we ol klab i ken kisim ol pilai long en. Olgeta kona bilong kantri, bai yu ken painim wanpela hap spes wantaim tupela pos i sanap long wanwan sait bilong fil, na olgeta kain pikinini i save pilaim dispela gem.

Samtong mi laik tok, em klab menesmen i no lukluk gut long painim. Dispela i min olsem ol klab skaut bai mas go aut na painim ol talen. Dispela i nidim risos long mekim kamap gut dispela wok. Moa risos klab i yusim, mobeta ol risal em bai lukim.

Taim yu lukluk long ol hiden talen, i gat ol arapela eria klab menesmen i mas lukluk long en. Ol eria olsem strongim laip an sindaun bilong ol, olsem kaikai, haus o rum-silip, trenspot, ol alawens, wok na ol arapela samtong. Hia, yu bai lukluk long sindaun bilong ol pilaia, taim ol i kam tren long pilai makim klab bilong yu.

I tru olsem dispela wok bai kaikaim bikpela hap mani bilong klab, tasol long longpela taim bihain, bai yu ken lukim kaikai bilong dispela hatwok. Klab menesmeni mas sindaun na plenim ol rot bilong yusim gut mani, na wanem kain kaikai bilong wok, ol i laikim.

Mi laik givim sampela ol aidia we i ken halivim yu long karimaut dispela wok stret. Pastaim long yu nominetim klab bilong yu long go insait long Nesenel Soka Lig, yu mas save pinis long ol kain pilaia yu nidim. Dispela bai stat long golkipa, ol difenda, ol midfilda, na ol straika. Kwolati bilong ol pilaia bai makim stail bilong yu long pilai.

Ol teknikal wokman bilong yu, olsem ol kosa, trena na tim menesa i mas givim planti tingting long dispela sait. Sapos yu nidim ol ol-raunda pilaia, yu mas lukluk gut na painim.

Mi save olsem i mas i gat planti ol pilaia i hait stap, husat i wetim sans tasol long soim strong na save bilong ol long pilai.

Mi save olsem ol kain pilaia ol i makim, em i no gutpela tumas, bikos i gat planti arapela samtong i stap we mipela i no inap long senisim. Samting olsem ol risos mipela i gat, em i wanpela bikpela samtong we i pasim wok painim bilong yu.

Sanapim ol skaut bilong yu long ol eria we soka em i bikpela, long painim ol pilaia yu nidim.

Em nau, stretim rot long kisim ol i go long kem. Sapos ol pilaia i no soim strong, em i rait bilong yu long pinisim skolasip bilong ol na senisim ol wantaim ol arapela we yu makim pinis.

Yu mas redi pinis long neks sisen i kam. Traim sampela ol samting mi givim pinis, na lukim wokabout bilong yu. Tasol wanem samtong yu mekim, bai inapim hatwok yu givim long dispela wok.

## Stretim Taurama Jim trening senta

**i kam long bek pes**

Tasol ol tu i kirap nogut long lukim dispela jim i kamdaun pinis na nogat senis bilong em i kamap,"Canny Cooper i tok.

"Nau mipela laik go long nesenel sempionsip long Rabaul long Jun bilong ol i mekim seleksen bilong ol lain bai go long 8 Pasifik Bodi Bilding Sempionsip long Tonga insait long mun Oktoba 2013, tasol mipela wok long yusim hom med ikwipmen long trening i stap na i no gutpela tumas," em i tok.

Tim Nesenel Kepital Distrik Bodi Bildas (Team NCD), i save winim ol medal long taim bilong nesenel sempionsip na bringim medal namba bilong NCD i go antap long ol spots, bikos i gat gutpela jim wantaim ol samtong bilong trening i stap long ol spot man na meri.

"Nau tu ol arapela senta i wok long lukdaun long ol NCD Tim bikos ol i nogat gutpela trening ples. Tasol mi gat bikpela bilip olsem ol mangi bai mekim gut yet bikos em samtong i stap long blut. Mipela wok long was na kaikai ol gutpela kaikai olsem kumu na frut long stap gut na traime long mekim sampela kain ekseais olgeta de," Mista Cooper i tok.

Insait long Spirit bilong Gems na ol i laik stretim jim long rere long 2015 Saut Pasi-



fik Gems, tasol bilong mipela long wet tupela yia long redi em bai tu let. Olgeta NCD tim bilong Bodi bilda, weit lipta, pawa lipta na ol arapela spot tu bai i no nap mekim gut bikos

nogat ples bilong trening.

Spot Minista na Minista bilong Saut Pasifik Gems mas hariap long sanapim wanpela ples insait long stedium long mipela bai wokim trening bi-

long mipela gut. Mipela nidim tru ol ikwipmen bikos em save helpim mipela long skelim mak bilong mipela long apim hevi ain samtong long lukim strong na weit bilong mipela.



**DIANA Blu**  
**TUNA IN OIL**

NEW IMPROVED!  
 TUNA IN OIL  
 Net Wt. 425g

Moa oil na meat insait

# Stretim Taurama Jim i bagarapim trening bilong ol spot man, meri



TRIPLE MASOL MAN: Peter Dai, Iso Fins na Canny Cooper, ol bodi bilda bilong Pot Mosbi. *Poto: Nicky Bernard.*

Frieda Kana i raitim

“GUTPELA long Ministri bilong Spots i rausim haus bilong Taurama Leisa Senta na Jim long-Nesanel Kepital Distrik, bilong redi gut long taim bilong Pasifik Gems long 2015, tasol ol i no luksave long nid bilong ol gras rut spots man na meri long wokim trening bilong ol long kainkain spot na ek-sesais,” Canny Cooper, Presiden bilong NCD Bodi Bilda Asosiesen, i tok.

NCD Mosbi Bodi Bilda Asosiesen i autim wari bilong ol long dispela wik olsem ol i painim hat long go het wantaim trening bilong ol long rere long Nesanel Sem-pionsip we bai i kamap long Rabaul long Jun 8, 2013.

Cooper i tok, na ol spots man i nidim ples na ol ain samting bilong ek-sesais na trening tasol ol i rausim na

putim insait long kontena na nogat toksave.

Em i tok, insait long spirit bilong spot na ol i rausim dispela jim long rere gut long bikpela Pasifik Gems long 2015, tasol ol i no hariap long kirapim wanpela ples bilong ol lain bai go het yet long trening long namel taim i nap tupela yia.

“I no ol bodi bilda tasol, nogat. Igat ol narapela spot olsem weit lipta na pawa lipta tu i save nidim dispela trening ples. Na narapela tu olsem, nau i gat planti sik bilong ol man i kaikai gris tumas na wok tumas na planti hat atek i wok long kamap na ol i nidim ek-sesais long olgeta de.

Wanpela bilong ol Kor-poret bodi em Telikom PNG husat in bin kamap memba i no long taim i go pinis bilong ol wokman na wokmeri bilong ol i ken go ek-sesais long jim.

*Moa long Pes 27.*

**Valvoline**  
**PMV**  
 DIESEL OIL

**PMV OIL BILONG YUMI**

**BOROKO MOTORS**

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GORDKA	532 3552

Email: info@borokomotors.com.pg  
 Website: www.boroko-motors.com